


UBUSŪNGULÌGWE NA KYALA U BUYO BWA KWĪPUTILÁMO

 Unko uswe tusyale twimile pa kabalilo bo uswe tukwinamisya imitu gyitu ku lwiputo. Kangi lilino, ni mitu gyitu ginamisigwe, kangi une ngusubila indumbula syitu sineme, syope, Une nguswiga balinga muno ikilo iki bikulonda ukukumbukiligwa ndwiputo, isya kindukimo ikipaguligwe? Ngimba umwe mubagile ukufyusya ikiboko kyako, yoba, “Kyala, mbapo une ikilo iki kila iki une ngulondesya.” U Ntwa akusaye ugwe.

² Gwitu Tata Gwakumwanya, bo uswe lilino nulwiisyo tukusegelela ku Kikota ikikulumba ikya ipyana, nu lwitiko, uswe tukusema mu Fyakukindapo; kũko Kyala, na Bãndúmi, kangi aba Kerubi, na bosa aba filundilo Fyakumwanya fyo fibũngéne palikimo. Kabuno Umwene äyobile pala pakabagila ukuyapo imbelebesya ukugwa pasi kisita u Tata Gwakumwanya ukuyimanya iyene. Ko kukindapo kuki Umwene amenye apa akabalilo kako abamia ba bãndu bali ni imitu gyãbo gĩnamisigwe, nukukóléla pa Ugwe panongwa ya fyãkusúma ifyapalubafu. Tãta, kéta pási pa bafũmbwe nkĩsu ikilo iki, kabuno uswe twe bandu bafũmbwe.

³ Kangi une ngusuma, Kyala, ukuti panongwa yakuti uswe twibungenie apa nu kwiyobela kwa Ugwe u lwitiko lwitu mwa Kyala ugwabumi Yuyo naloli ikwamula inyiputo; uswe tusókile ukufuma nkisu kya basitakubutigwa, ubwa ndumbula ni mbulukutu, tusókile panja ukwitugala imyumi imipaguligwe, kangi ukwitugala mu kufumusya u lwitiko lwitu mwa Ugwe. Ikilo iki uswe tufyũsisye amaboko gĩtu, nukuyoba, “Uswe tuli bafũmbwe.” Gwempala Kyala, âmula kilikyõsa ikya fyãkusúma fyãbo.

⁴ Kangi polelo, Tãta, uswe tukusuma ukuti Ugwe kutuyãtĩla uswe ikilo iki mu Lisyu. Uswe tukwisa apa kuli ulufundo, kuli ulupilikisyo, ukuti uswe tubagile ukumanya itolo mumo tubagile ukwitugalila mu lisiku lwamwisyugu ili; kyo fiki ukukigũlila, kyo fiki ikyakubomba. Kabuno, uswe tumenye u Kwisa kwa Ntwa kukusegelela kifuki, ukufwana ni fimanyilo fyosa ifi abasololi bãyobíle-ngãni. Uswe tukuya kifuki na kabalilo, Ntwa, akabalilo kãko ulubãngo lõsa lwisakupigwa ku bãna Bãko. Kyala, unko uswe, aligwesa, tuyege kula, Tãta. Palingayaga nayumo ayongile. Iyo yo fundo yitu iya kuya apa, Ntwa. Uswe tukuganile Ugwe, kangi uswe tukugela ukwitendekesya ku sala yila.

⁵ Yoba kwa uswe, uswe tukusuma kangi, ikilo iki. Kangi bumbulusyaga ababine. Bosa ababine na bonywa aba bali nnyumba iyi, uswe tukusuma ukuti Ugwe kubabumbulusyaga abene, Ntwa; kangi fiyofiyo abene ni fumbwo syamwambepo. Uswe tukusuma ukuti Ugwe kupokaga umoyo gosa untagigwe. Isusya umwitiki aligwesa na Mbepo Mwikemo. Kangi pupwaga ubukafu na Maka mu bana Bako abakwitika. Tupaga ifindu ifi, Tāta. Uswe tukusuma fingi, panongwa yakuti Ugwe gwātubūlile uswe ukusuma, “suma mbwingi, sumila ifindu ifikulumba, fingi fya ifyene,” ukuti isangaluke syitu sibagile ukwisula. Kangi uswe tukusuma isyene mu Ngamu ya Yeso Kristi. Amen.

Mulitugasyaga.

⁶ Une nalolili ngukyega iki lusako lwapamwanya ikilo iki, ukugomokela apa pa kigemo kangi, apa mu sukulu yapwamwanya iyi, ukuketana na aba abandu abanunu aba aba babuungene panja ukupilika i Nongwainunu. Une ngusuma i kisa kya Kyala ukundula une ukubabula umwe u Bwanaloli mumo une mmanyile u Bwanaloli. Umwēne akāli abagile ukwīgāla akanwa ka mūndu, mulamula mūmo Umwēne ābagile undomo gwa ngalamu. Kangi linga une nabagilemo siku ukugela ukuyoba kalikosa aka kāli kasobi kangi kakulwana nu bwigane Bwake, ulwīpūto lwāngu ulwabwanaloli lo kokuti Umwēne ābagile ukwīgāla akanwa kāngu, ukuti une ndisakuyoba ikyēne. Kabuno, nubwanaloli, une ngulonda ukuya ku Mwanya, nimwēne; kangi une ndisakuyāmo siku kula, kangi, palubafu pa fyosa ifyo, une nguyaga ndongosi ugwabutungulu, umunduyumo uyu aabombile ikindukimo mbusyobi. Linga une ngubomba ikyene, ikyene kyo nongwa yakuti une ngamanya ukukindana nakumo. U Ntwa abasaye umwe.

⁷ Lilino, kilabo kulubunju, linga ikyene kikuyaga bwīgāne bwa Kyala, une ngulōnda ukuyoba pa kimanyisyo kila, *Bwegi Nu Kusōka*. Kangi uswe tukusūbila ukuti umwe mwisakwīsa, nukutwāla ikisimbilo ni fikalatasi. Uswe tutisakwēga akabalilo katali fiyo, lōli une itolo ngulōnda uku. . . Yila yāli fundo yāngu iya kuya ngomokile apa, tāsi, mu Indiana, ukuti une nāfīngile umwe ikyo. Kangi une ngugelaga, kilabo kulubunju. Linga une ndikukimalisya ikyene kilabo kulubunju, une ngubombaga kilabo nkilo. Lōli une nguyaga pakugela kilabo kulubunju, linga u Ntwa ikwitikisya, ukuyoba pa kimanyisyo, i sukulu ibili sya minogono. Kangi Kyala alitututulaga uswe ukumanya iki kyo Bwanaloli, ukumanya itolo iki kyo Bwanaloli, ukuti uswe tubagile ukwenda mu Bwanaloli kangi mu Lumuli. Uswe. . .

⁸ Umwe mumenye, nalisibile ukuya nu mwinangu unkangale ugwalangi. Umwene alinkuyoba kwa une, umwene alinkuti, “Nkundwe Billy,” umwene alinkuti, “Une—une ndikulonda ulutamio lulilosa ku kisoko.” Umwēne alinkuti, “Une ngulōnda ukuya ni tikiti lyāngu nkiboko kyāngu. Kangi akabalilo kāko upyoto isakupūta, une ndikulōnda ulutamio lulilōsa pala. Une

nunsumile u Ntwa, akabalilo katali aka kakĩndĩle, linga kalipo kalikosa aka katamisye, unko une ndendekesye akene lilino ulu,” alinkuti, “panongwa yakuti ukwēne kwisakuyaga ngĩsi kangi kusambuke pa lubunju lula akabalilo kāko i sitima yikukwābila pānja kuli ulubafu ulungi.” Alinkuti, “Une ndikulonda bulibosa ubusofanie. Une ngulonda ukupakikisya fyosa ifya ikyene lilino.” Ikyo kyo iki uswe tuli apa, ukugela ukupakisya fyosa ifya busofanie, ukuti uswe tubagile ukwenda ukufyuka pa sala yila.

⁹ Lilino, une ndisakuyobaga kwa umwe akabalilo katali fiyo ikilo iki, panongwa yakuti uswe tuli ni ngomano ibili kilabo. Kangi polelo une ngukeyega ikyene papapa itolo, pabuyobumo ubungi, ku bungi, imbombela isyakongelelapo.

¹⁰ Loli, lilino, mwa Buku gwa Kukumbusya. Une ngulonda ukubala ukufuma ku ntu gwa 16, amanandi gakwanda matatu, aga Kukumbusya 16:1 ukufika 3.

Kumbukilaga u mwesi gwa Abibi, kangi kyungaga u pāsa . . . u NTWA Kyala gwinu: . . . mu (gwa kina) umwēsi gwa Abibi u NTWA gwāko Kyala ākutwēle ugwe pānja pa—ukufuma ku Igupti ukwisila pakilo.

Umwe polelo mwisa kukemesye i pāsa kwa NTWA Kyala gwinu, ifya mitimo kangi ifya ng’ombe, mbuyo ubu u NTWA asūngwile ukubika i ngamu yake pala.

¹¹ Lilino, ikimanyisyo kyangu ikilo iki kyo: *Ubusūnguligwe Na Kyala U Buyo Bwa Kwīputilāmo.*

Linga umwe mukukētésya, umwēsi A-b-a-d . . . -b pala alipo, kokuti, “Epulelo.” Umwēsi gwa Epulelo ko akabalilo kāko abēne bātswāligwe.

Kangi lilino ikindu ikihesya kyo kuti uswe ikilo iki, ukuya biputi ba Kyala, mu lisiku ili lilyo uswe tukwitugasyamo, kangi uswe tukwaga ifundo nyingi fiyo isyakukindana isya bandu. Kangi akabalilo kōsa silipo i fundo ingindane ukufwana ni kindu, gikufimbilisigwa ukuyapo amalālúsyo amakĩndáne; pabagile ukuyapo ilyāmúlo limo ilyabwanaloli ku lilālúsyo lililyōsa ili lilālúsígwē.

Linga une ngulālúsyā ililālúsyo, “Ngimba iki kyo fiki?”

“Ena,” abene babagile ukuyoba, “i mesa.”

“Ngimba ikyene kyo kya fiki?” Muketile?

¹² Lilino, pala, umunduyumo abagile ukuyoba, “Ikyene kikaya ki mesa. Ikyene kyo bolodi.” Ena, ikyene kyo kibolodi, loli pópe ikyene kyo mesa. Umwe muketile, pikufimbilisigwa ukuyapo ilyāmúlo ilyabwanaloli ku kyene.

Kangi linga une mbagile ukulālúsyā ililālúsyo ilya kalikōsa, kukufimbilisigwa ukuyapo ilyāmúlo ilitalusye. Kubagile ukuyapo ikindikimo kifuki ku kyēne; lōli kukufimbilisigwa ukuyapo ilyāmúlo ilitalusye, ukwāmúla ku lilālúsyo lililyōsa.

Popápo, polelo, ililálúsyo lililyōsa ili likufyūka mmwanya mbūmi bwītu, likufimbilisígwa ukuyako ilyāmúlo ilitalusye, ilyāmúlo ilitalusye.

¹³ Kangi lilino, umwisyugu, uswe tukupilika—tukupilika ilyene lyāyobile, bingi fiyo ba bandu bitu nkisu umwisyugu . . .

Bo ukuya gwa misyoni, negile amabwendo mingipo ukukilania inyanja kangi ukusyungutila ikisu kyapasi, Une njile mukulungisania na kiputilo akingi akakukindana, bo ba Buddha, kangi ba Mohamadi, kangi ba Sikh, kangi ba Jains, kangi fiki-ifyakongelelapo, ifya kiputilo fya nkisu kyapasi. Kangi polelo muno mu United States gwitu twibene; kangi ifīsu ifingi ifihesya, ukwagana ba fyosa ifya fipanga fyitu ifikindanekindane, bo fipanga-fipaguke fyitu, ukwandila na kubwandilo Katolika gwa Roma, kangi polelo ku ba Griki, na fyosa bo ifyo, kangi i—i fyiputilo ifikindane, kangi polelo ukusuluka mu i . . .ingulilo sya fipanga-fipāgūke fyōsa, isya bamia lwele-na-yumo na-kimo ukongelelāpo ifipānga-fipāgūke ifya Protestanti ifikindāne.

Lilino, kilifyosa kya ifyene, ena, ugwe gwābagīle ukukēta ifundo syābo, kangi une ngabagīla ukubalēyēla abēne. Kilikyosa kikwīyobela ukuti abene bo bwanaloli, abene bali nu bwanaloli. Kangi abandu aba bīngīle ku fipanga fila bikufimbilisigwa ukwitika ikyo, panongwa yakuti ifyene fikitike ubwabo—ubwabo ubufikilo, ubufikile bwabo u Bwasypwa, pa bumanyisi bwa kipanga kila. Kangi ifyene fyo fikindane fiyo, kimo ukufuma ku kingi, mpaka ikyene kikupela amalālúsyo abamia lwele-na-yumo ni kindukimo.

Polelo, ukuyapo amalalusyo bamia lwele-na-limo ni kindukimo, pikufimbilisigwa ukuyapo i Lyamulo ilitalusye limolyene. Kangi une ngulonda kuli uswe ikilo iki, ukuya ukuti uswe tukugela ukubuka ku Mwanja, kangi ukwakwagana nu Ntwa gwitu Yeso Yuyo uswe twesa tunganile, une ngulonda ukulōndesya m'Masimbo ukulyaga ilyo.

¹⁴ Lilino, linga ilyēne lya ililálúsyo lya i Bāngéli, polelo ilyēne likufimbilisígwa ukuya nalyo i lyāmulo lya i Bāngéli. Ilyene lingabagilaga ukufumila ku kibugutila kya banyambala, ukufuma ku bulilanisi bumu bulibosa, pamo ukufuma ku bumanyisi yumo, pamo ukufuma ku kipanga-kipāgūke kimo. Ikyēne kibagīle ukwisa ukutalula ukufuma mu Lisimbo, kūko u buyo bwa lukomano lwa Kyala luli, ulwa bwīpūti. Kangi naloliloli, ukuya Kyala, bulipo u buyo bwakwaganilana pa buyobumo, ubu Umwene ikwagana.

¹⁵ Lilino, uswe tukusyagania apa ukuti mu Kukumbusya Indagilo apa, ku bwandilo, Mōse ikwandisya ukugomokela mu Lisimbo, ifindu ifi umwene ábabulile abene, mumo Umwene ábatwele abene panja ni kiboko ikikulumba, ikyamaka, ukufuma mu Igupto, kangi ikyakwanda abíkésye abene.

Abēne bābilikilígwe “a bāndu ba Kyala” mpaka abēne bāsokága ukufuma ku Igupti, kangi polelo abēne balinkubilikígwa “i kipanga kya Kyala.” Panongwa yakuti, ikipanga kyo kyakubūngana, pamo, naloliloli, i *kipānga* kikusanusya “abakōlelígwe-panja bala,” bala bābo bakōlelígwe panja. Kangi abēne bikusōkámó mu Igupti, ukuti bayege kipanga.

¹⁶ Lilino Kyala ababulile abene, akabalilo kako abene... bo abene bakāli bakíkasya i tempeli kangi kalikosa abene bábombile, “Une ngusalaga ubuyo bwa bwīpūti Bwāngu, kangi une nisakubika i Ngamu Yāngu mu kyēne.” Kangi ubo bo buyo bwene ubu Kyala ābagile ukwaganamo siku na aligwesa, bwāli ukwisila mu kusála Kwāke Mwene. Umwēne āsalile ubuyo Bwāke, kangi kūko Umwēne āsalile ubuyo Bwāke, Umwēne ābīkile i Ngamu Yāke, ilinandi lya 2 apa likutubūla uswe ikyo; Umwēne abagile ukubika i Ngamu Yāke mbuyo ubu Umwēne āsalile abāndu ukummwīpūta Umwēne nkati. Lilino, ikindu kya ikylene kyo kili, uswe tukulonda ukusyagania kūko ubuyo bula buli.

¹⁷ Nkati mwa fundo bamia lwele-na-yimo ni kindukimo, ukuya ukuti uswe tukukilaniapo fyosa ifyīputi fyafifwani, kangi itolo ukuyoba isya bwīpūti bwa Kíkristi. Iki, une ndinako ukwipilika ku biputafifwani, pamo une naloliloli ngubagilaga ukubuka kula nukuyoba ku bene. Lōli, abēne bo basóbi. Ikíkristi kyo kyēne ikyo kyo kyabwanalōli, kyo Kíkristi. Kangi une nguyoba ikyo kikaya katikati nongwa yakuti une ndi Nkristi; panongwa yakuti, une ngwitika ikyo ukuya Bwanaloli. Ubwene bo bwīputi bwēne ubu bo butalusye.

¹⁸ Une njīleko ku lipumba kūko ifalasi inyelu yikwanduligwa isala sina silisyosa. Kuko, Mohammed, umputi unkulumba kangi—kangi ndongosi ntalusye ukufuma palapala kwa Kristi, ābagile ukuya nsololi, kangi, une ndikwilamwa loli umwene āli, ukufuma itolo ku bakundwe ba Maccabee. Loli akabalilo kako abene... Umwene āfwile. Umwene āliyobile ukuti umwene isakusyukaga kangi nu kuponjolaga i kisu kyosa. Lilino, kifuki isala sina silisyosa abene bikwandula abasikali, kangi abene bikukyunga i falasi inyēlu ku lipumba lyāke. Abēne bali nakyo, ku fyīnja maelifu mabili, ukugūlila umwēne ukufyuka nukupōnjóla ikīsu. Lōli umwe muketile... .

¹⁹ Kangi ugwe kubuka kwa Buddha; Buddha ali nu bumi ifyinja ba mia bingi, ukufwana ifyinja abamia malongo-mabili-na-fitatu ifi fikindilepo, u kyala gwa—gwa Japan. Kangi popāpo umwene āli ndondesya-mahala, ikindukimo ngati Confucius, na fyosa bo ifyo.

Loli bōsa aba, buno... bālwaló, na fyosa bo ifyo, bōsa abene bāfwile na mahala gabo, kangi basyīlígwe kangi bali mu lipumba.

Lōli i Kikristi, iki kitikilígwe na Yeso Kristi, pala lilipo ilipũmba ilisitakandu. Umwene āli yo Nnyambala mwene uyu alimilemo siku pa kisu, nukwitugala nu kuyoba, “Une ndi na maka ukulambalika ubumi Bwangu pasi nu kubusyusya ubwene mmwanya kangi.” Kangi Umwene ābombile ikyene. Kangi Umwene mumi umwisyugu.

Kangi uswe tumenye Umwene ikwitugala, panongwa yakuti Umwene ali na uswe nukwisisimikisya Mwene ukwisila mu fimanyilo ni fiswigisyo fyakupalamasígwa, ukuti Umwene aafingile ukuti Umwene ikubombaga ukunangisya ikyene. Fiyofiyo, ukuya Mbanda ya Moto iyi yalongolile abana ba Israeli ukwisila mu lulangalanga, Iyene yili na uswe umwisyugu, nukuya ni pīcha Yāke yēgile; ukubōmba ifimanyilo ni fiswigo ifi Umwēne āfingile Ikyēne ābagile ukubōmbāga mu lisiku ili, ukuketa a Masyu gosa aga Umwene afingile ukubonekela ilisiku ili. Polelo, ifingi fya nkisu kya biputafifwani kili panja. Ikyēne kyo Kikristi!

²⁰ Lilino, ukuya ukuti galipo amalālusyo bamia lwele-na-limo ni kindukimo ukufwana ka kūko Kyala ikwagana, “Umwene ikwagana na baMethodisti, pamo Umwene ikwagana mu baBaptisti, kangi Umwene ikwagana mu *iki*, kangi *kila*, kangi *ikingi*.” Lilino, lilipo ililālúsyo kula, popāpo aligwēsa ikufimbilisígwa ukulōndesya panja ubupoki bwāke mwēne nu kutetema.

Lōli ikilo iki une ngulōnda ukugela ukwāga, nukusisimikisya mu Lisimbo, kūko ubuyo ubutalusye buli kūko Kyala ikwagana nu kwīpūta na bāndu. Kangi, linga ikyo kyo kyene, ubo bo buyo bwene Umwene isakwaganamo siku.

²¹ Lilino, uswe twālyēgile ubusīmbe ubu ukufuma mu Kukumbusya. Ilyene lyo lisyu lya kiGiriki ili lili ni lyapabili-pabili, pamo, ilyene likusanusya, “indagilo sibili.” Ilisyu lya kiGiriki, *Kukumbusya*, “indagilo sibili isyakukindana.”

Kangi ikyo kyo itolo iki Kyala ali nakyo, indagilo ibili ingindane. Kangi lumo mwa syēne lo lulagilo lwa bufwe, kangi u lungi lo lulagilo lwa Būmi. Kyala ali ni ndagilo sibili. Ukunkonga Umwene, nukumbombela Umwene nukummwiputa Umwene, bo Bumi; ukupika Ubwene bo bufwe. Silipo indagilo sibili mwa Kyala.

²² Lilino, limo mwa ndagilo sila syāli-. . . sītikisigwāga ku kīsu, ku Kyāmba Sinai. Kyala āpéle ululagilo kwa Mōse na Israeli. Komma ukuti ululagilo lwābagile ukubatūla abēne, lōli u lulāgilo lwēne itolo lwāsosolaga panja ku bēne ukuti abēne bāli batulwanongwa. Mpaka akabalilo kala, abēne bakāmēnye ukuti ubutulwanongwa bwāli fiki, mpaka abēne bāli nu lulāgilo. Bukābagila ukuyapo u lulagilo kisita lufūndo. U lulāgilo lukaya lulagilo, kisita lufūndo. Popāpo, polelo, “Ingilanio sya lulagilo lo butulwanongwa, kangi imifūnjo gya butulwanongwa bo bufwe.”

Popāpo polelo, mpaka Kyala abatēdekile u lulagilo, yikālipo i ngilanio nayimo iyi yanāngisigwe ku bene.

Linga lukayapo nalumo u lulagilo apa ulu lukuyoba ugwe ukabagila ukubopa ukukilania amamailosi malongo-mabili pa sala yimoyene, polelo ugwe gwābagile ukubopa ukukilania amamailosi malongo-mabili pa sala yimoyene. Lōli akabalilo kākō lulipo u lulāgilo lukuyoba ugwe ukabagila ukubōmba ikyēne, polelo lulipo u lulāgilo nu lufūndo lwa ulwēne.

²³ Lilino, u bufwe, ululagilo lwa bufwe, bwāli ngōmelesyo sipegigwe pa Kyamba Sinai, ulu lwāmbūlile u nnyambala ukuti umwene āli ntulwanongwa. Kangi, ukukilania u lulagilo lwa Kyala, umwene afwaga. Loli bukayamo nu bupoki nabumo mu lulagilo. I. . . Ikyēne kyāli itolo nnyambala nsikali uyu ābagile ukukubika ugwe mminyololo; ikyēne kikāli nakyō nakimo ukukutwāla ugwe panja nakyō.

Lōli polelo Umwēne āpēle u lulagilo ulungi, lula lwāli ku Kyāmba Kalvari, kūko ubutulwanongwa bwalitikisigwe mwa Yeso Kristi, kangi pala u lufundo lwāhōmbigwe. Kangi komma ni. . . Kisita ngomelesyo, “loli ukwisila mu lipyana ugwe upokigwe,” ukwisila mu lipyana lya Kyala, ukwisila mu kutendekelanganila kwa Kyala ko kumanyilanganila kwa mundu gwako.

²⁴ Lilino uswe tukukēta indagilo sibili isi, Kukumbusya, ukuyoba isya indagilo sibili. Syalipo indagilo sibili. Lumo lwāli lulagilo lwa bufwe, kangi ulungi lula lulagilo lwa Būmi.

²⁵ Syalipo kangi inyitikano sibili sipēgigwe ku bandu. Uswe twisakuyoba isya syene ndubunju.

Yimo mwa isyēne yāpegigwe kwa Adam pa kayilo, “linga ugwe kubōmba *iki* kangi utikubōmba *kila*,” lōli ululagilo lula lwābongotoligwe. Adam, Eva ābongotwile ikyo, mu ngunda gwa Edeni.

Polelo Kyala alinkutēndēka u lwitikano lwakibili, kangi alinkūmpa kwa Abraham, kangi u lulagilo lula lwāli lusitakayilo. “Ikyene kikaya iki ugwe ubombile pamo iki ugwe kubombaga;” Umwene alinkuti, “Une ndalile mbōmbile ikyēne.” Ilyo lyo ipyāna. Ulo lo lulagilo lwa Būmi. Kyala ābōmbile ikyo panongwa ya Abraham nu Luyungu lwāke ukufuma ku mwēne, ikyo kyo, lōsa ulwa Luyungu lwa Abraham.

Mūmo i Bāngēli lyāyobīle, “Israeli gwesa isakupokigwa,” lōli ikyo kitikusanusya abaYuda. Bo Pauli āyobīle, “Ukuti Israeli uyu ali mubwankati, pamo Israeli mubwapanja.” “Mubwapanja,” mūmo uswe twāyobelāga ikilo kimo, ikyēne kyāli bāna ba Isaki, ukwisila mu kugonana. Loli ululagilo lwa Kyala lwāli ukwisila mwa Kristi, ulu lwāli Luyungu Lwabunyafyale lwa Abraham, ukuti, “ni ipyana gwesa Israeli apokigwe.” Ikyo kyo, “Bōsa aba bali mwa Kristi bapokigwe,”

bōsa, u lwītíkáno lwa Kyala ulwakibili. Lōli ifindu fyōsa ifi fyabīkīgwe unsyūngulu gwa nkyeni gwa Kristi.

²⁶ Lilino kētésya i linandi lya 2. Ilinandi lya 2 apa mu Kukumbusya 16, “Iputilaga mbuyo ubu une nsalile.” Lilino ugwe kufimbilisigwa ukummwiputa Kyala, Umwene alinkuti, “Mbuyo ubu une nsalile,” komma iki yumo uyungi āsalīle, loli, “iki une nsalile.”

Lilino, linga Kyala āsalīle u buyo, ikyēne kikwīsa kwa uswe polelo ukusyāgānia iki Umwēne āyobīle ukufwana ni kyēne. Kangi ko kūgu ukwēne? Une ngulōnda ukubwāga ubwēne, panongwa yakuti, nubwanaloli, une ngulōnda ukummwīpūta Umwēne.

Uswe twesa tuli apa, ikilo iki, ukuntufya Umwene. Uswe twitugesye apa ikilo iki, ukuya ba Methodisti, Baptisti, Katolika, Jehovah Witness, Christian Science, na bosa, lōli uswe twēsa tukulōndésya ikindukimo.

Uswe tukulonda ukumanya u Bwanaloli. Ili Bangeli lyāyobile, “Umwe mwisakumanyaga u Bwanaloli, kangi u Bwanaloli bwisakubapela umwe bābūke.”

Umunduyumo, ugwe ukabagila ukumanya iki ugwe kubomba, ugwe utikumanya akabōmbélo ka ikyene mpaka ugwe umenye akabōmbélo ka ikyene; ugwe utikumanya isyakubomba mpaka ugwe umenye akabōmbelo ka ikyene, ndigi. Ugwe kufimbilisigwa ukumanya iki ugwe kubomba na mumo kubombaga ikyene.

²⁷ Iki kikutunāngísya uswe ukuti Kyala ali nu buyo bwa lukomano kuli biputi Bāke, mu buyo bumobwene bumo. Mbuyo bula, bwēne, Kyala ikwagana na biputi.

²⁸ Lilino, ukongelelapo, ubuyo Umwene asalile kuli a biputi Bake, Umwene ayobaga Umwene ikubikaga mu Ngamu Yake. Lilino unko uswe tulondesya mōsa nu kwāga, ukukulania mu Lisimbo, kūko ubuyo ubu buliko. Naloliloli, linga Kyala āyobīle Umwēne ābagīle ukubīka i Ngamu Yāke mbuyo ubu kūko Umwēne āsalīle ukwagana na bāndu nu kwipūta na bēne. . . pamo abēne ukummwīpūta Umwene, ndigi, ukuti ubwene buli kubuyobumo mu i Bāngéli, kabuno ubwene bwāli ku ngulilo syōsa.

²⁹ Kangi u Kyala unkulumba unsitakusanuka akabagila ukwanduka. Umundu ikusanuka. Loli ugwe ubagile ukubika ubumi bwako pa kilikyosa iki Kyala āyobīlemo siku pa kabalilo kalikosa, panongwa yakuti ikyene kyo Bwanaloli. Ikyene kyo Bwanaloli. Panongwa yakuti, ikyo kyo kindu kyene iki une mbagile ukuya nu lusubilo, lyo i Bangeli. Panongwa yakuti, ilisyu lya mundu lisakutoligwa, loli Kyala yo gwapamwanya.

Ikyinja iki une mbagile ukumanya fiyopo ukukinda mūmo une nākimenye nkyinja. Ugwe kufimbilisigwa, nugwe, ilisiku lililyosa. Uswe tuli nu mpaka, polelo uswe tukukaba ubumanyi.

Loli Kyala nsitampaka. Umwene nsitampaka. Kangi, pakuya nsitampaka, Umwene akabagila ukukaba ubumanyi. Umwene ali mpelelesye, ukwanda itolo. Ilinogono lililyosa likufimbilisigwa ukuya katikati litalusye.

³⁰ Kangi mumo Kyala ábombelaga akabalilo kamo, Umwene ikufimbilisigwa bwilanabwila ukubombela injila yila, pamo Umwene abombaga mbusobi akabalilo kako Umwene abombege akabalilo ka kwanda. Linga u nnyāmbála isilemo siku kwa Kyala panongwa ya bupoki, pa lwālo ulu Umwēne ālimmwitike umwēne, ikyene kikufimbilisigwa ukwitikisigwa pa lwalo lulalula akabalilo kalikosa. Uko ko kutalusya. Linga u nnyambala isilemo siku kwa Kyala ku bubumbulusyo Bwakyala, kangi Kyala alimmwitikisye umwene pa lwalo lumo, u nnyambala uyungi ikwisa, Umwene ikufimbilisigwa ukummwitika umwene injila yilayila, pamo Umwene ábombile mbusobi akabalilo kako Umwene ālimmwitikisye u nnyambala gwakwanda. Kyala átēndíke u lwālo ulu Umwēne ábagile ukwakwāgānapo nu mūndu. Umwēne átēndíke u lwālo iki Umwēne ábagile ukubōmba, mūmo Umwēne ikubōmbélagā ikyēne, kangi kila kyáli ukwisila mu lilopa lya kang'osi mu ngunda gwa Edeni. Kyala akayamo siku, akabalilo nakamo, ásanwisyemo siku ikyene.

³¹ Umwene ālinogwine mumo Umwene ikupokaga u mundu. Uswe tugelile umwisyugu ukumanyisya u nnyambala mu kyene; uswe tugelile ukumang'anyisya abene, ukugela ukubamanyisya abene, ukugela ukubapāgusya, ukugela ukubomba fyosa ifi ifindu ifingi fya luko ulungi; ukubatwala abene nkati, ukubayuganila abene nkati, ukubōsyela abene nkati, injila yiliyosa ifingi iyi yilipo, ukubatwala abene na bakalata. Lōli bakāli bikusyāla, yulayula, Kyala ikwagana nu mūndu pāsi pa Lilopa ilyonesígwe ilya Kang'osi. Ililopa lyaali njila ya Kyala ku bwandilo, kangi Ililopa lyo njila ya Kyala ikilo iki. Ikyene kyo kinunu ukubomba ikwilambila na fyosa ifindu ifi, loli ubupoki bukwisa kwene ukwisila mu Lilopa. Ililopa lyo njila yene iyi Kyala āsalíle ukupoka u mundu, kangi Umwene akabagila ukusanusya ikyene.

³² Yobu ali ni kindu kilakila. Umwene aamenye ukuti umwene aali ngolofu, panongwa yakuti umwene aabikile i—i likemo ili Kyala aalondigwaga ukufuma ku mwene.

³³ Lilino, unko uswe tulondesye lilino ukukéta iki u buyo ubu buli, kangi u buyo Umwene alinkubika i Ngamu Yake. Uswe tukuyaga pakusyāgānia kūko Umwēne ábikíle i Ngamu Yāke. Polelo, linga uswe tukusyāgānia iki i Ngamu ya Kyala yili kangi

kūko Umwēne ābīkīle Iyēne, polelo uswe tuli nu buyo bwa kwipūtīgwa nakalinga itolo bo uswe tukukyāga ikyo.

Ifindu fyosa ifi, ena, ikyene kyāli nsyungulu gwa findu ifya kwīsa. Ululagilo losa lwa bikilaga-ngani unsyungulu isya findu ifya kwisa.

³⁴ Itolo bo, u mwēsi go nsyūngúlu gwa lisuba. Ugwene gukubombela mukusitakuyapo kwa lisuba, itolo bo i Kipanga kyo kibagile ukubombela mukusitakuyapo kwa M-w-a-n-u-n-d-u-m-i-a-n-a gwa Kyala. Mukusitakuyapo kwa Mwanundumiana, u Lumuli uluninipo, i Kipanga, abitiki, bikumbombela Kyala kangī ikupa u Lumuli mu kusitakuyapo kwa Mwanundumiana. Lōli akabalilo kāko ilisuba likupānda, umwe mutikukēta u mwēsi kangī mma, panongwa yakuti ilyēne libūkīle pāsi. Ikyene kitikulondigwa ulumuli lwake kangī mma, panongwa yakuti ulwene lukuya lumuli lwake lwakibili, ukufuma ku lisuba. Lilino, bo yu ndume nu nkasi, ilisuba nu mwēsi guyīlile, Kipanga na Kristi.

³⁵ Lilino uswe tukwaga, ukuti, ifindu ifi ukuya nsyūngúlu gwa Kristi. Iikemo lililyōsa, nulusekelo, na filifyōsa mu Lwītīkāno Ulukúlu, fyabīkāga-ngani unsyūngúlu Kristi; itolo bo unsyūngulu gukutika ukukilania ikipālo. Lilino apa po pāpo uswe tukuyaga pakufīmbilisīgwa ukwāga ubuyo ubutalusye bwa bwīpūti, ko kugomokela apa mu Lwītīkāno Ulukúlu kūko ikyene kypapēgīgwe kangī ukuketa iki ifindu ifi fyāli.

³⁶ Lilino, akabalilo kako unsyungulu ikwisa ukukilania pa kipālo, ugwe ubagile ukukindanisya kali yo nnyambala, nkikulu, pamo kinyamana, pamo kilikyosa ikyene kibagile ukuya, panongwa yakuti ikyene kikutaga unsyungulu pa kipālo. Kangī bo unsyungulu gula gukuya mpimbapo, unsyungulu ukuya kyakusosyako kyake; kangī kukabagīla ukuyako ikyakusōsyāko kisita kyakōngānia. Polelo, akabalilo kāko ikyakōngānia kikusegelela ku kyakusōsyako, i kyakusōsyāko kikumiligwa mōsa ni kyakōngānia. U nsyungulu kangī i—kangī i kyakōngānia kikwisa palikimo, kangī ikyo kyo iki kikapela ikyene polelo i kyakōngānia.

Kangī linga “ifindu fyosa ifyaiyolo,” ili Bangeli lyāyobile, “mu Lwītīkāno Ulukúlu, fyāli misyūngulu gwa findu ifi fikwisaga,” kokuti polelo Kristi āli nsyūngulu gwa findu ifi fikwīsa.

³⁷ Polelo uswe tubagile ukuketa, ukwisila mu fyakwimilila fya Lwītīkāno Ulukúlu, kūko Umwene āsalile ukubika i Ngamu Yake, kangī uku. . .kuli lilino. Lilino, bo u nsyungulu go i. . .gukukilania i kipālo, une nāyobile, kyo kyakusōsyāko, ukuya kyakwimilia, popāpo uswe, abīputi, nūswe tubagile ukuketa imisyungulu gya Lwītīkāno Ulukulu fikusimilila nkati mu kyakōngania kya Ulupya.

³⁸ Lilino, isekelo syōsa, amasiku amikemo, ifitēmbē fyōsa, imipiki giligyosa, kilikyosa mu kitēmbē, kilikyōsa kyālimililile Kristi. Fyosa ifyabupi, indagilo syosa, kilikyosa kyaali mu lwimilililo lwa Kristi. Uswe tukindilemo mu kyēne, akabalilo ukufuma pa kabalilo, apa ku kitēmbē.

Polelo uswe tukukéta, ukwisila mu ifi, ukuti ikimanyisyo kilikyosa, kipanga, kangī i kipanga-kipāgūke kisōkilépo kubutali kunyuma. Ikyēne kikaya na mbubopesanie mma, na panandi. Ikimanyisyo kilikyosa, ikipanga kilikyosa, ikipanga-kipāgūke kilikyosa, kilēkígwe mōsa. Bukayapo nabumo u buyo kuli ifyene na panandi.

³⁹ Nakimo kyimililigwe mu Lwítikano Ulukúlu, pamo paliposa mu i Bāngéli, ikya kipanga, lōli ubumobwene bwakufimbilisigwa bwa kisonge kya Babeli. Ikyo kyo kindu kyene iki kikwimilila ubumobwene. Panongwa yakuti, ikyene kyāli ukwisila mwa Nimrod, unnyambala umbibi uyu ābukile panja nu kufimbilisya utwisu tosa utunini ukwisa kula mbuyo bumobwene kangī ikisonge ikikulumba iki. Ukwene kwali bwipūti bwa kwiputaputa, ena, loli komma ukwegigwa mu Lisyu lya Kyala. Popāpo apo po pāpo ugwe kukēta ubwīpūti bwa kipanga-kipāgūke, ubusōnge bwa Babeli, mu Lwítikāno Ulukulu. Iki, ubwīpūti ubu bwāli naloliloli bwīputipūti, lōli komma ubwīpūti bwa Lisyu lya Kyala.

⁴⁰ Kyala akasala mma ukuyibika i Ngamu Yāke mu kipanga-kipāgūke kilikyōsa. Une ngulōnda i Lisimbo kuli ikyēne, linga ikyēne kili. Une mmenye abēne bikwiyobela Umwēne abōmbile, lōli Umwēne akaya. Umwene akabagila ukubika i Ngamu Yake mmabuyo amingi, panongwa yakuti Umwene áyobile Umwene alinkubika i Ngamu Yake mbuyo bumobwene. Kangī, bula ubuyo bumobwene, kilikyosa kya kipanga-kipāgūke kyitu kikulonda ukuyoba abene bo buyo bula, loli ikyene kikīndene.

Loli ngimba ko kūgu Umwene abikīle i Ngamu Yake?

⁴¹ Lilino, kangī, Umwene, ngimba i Ngamu Yake yo fiki, ikyākwānda? Uswe twisakufimbilisigwaga uku (Ngamu) ukuyāga iki i Ngamu ya Kyala yili bo uswe tukāli ukukyaga iki ikyene kili Umwene ikubika mu buyo.

Lilino, uswe tukusyāgānia ukuti Umwēne āli na mapalo mingi. Umwēne ikubilikigwa...Umwēne ākoleligwāga “Tāta,” aga go mapalo. Kangī Umwēne ābilikigwāga “Mwanundumiana,” aga go mapalo. Umwēne ākoleligwāga “Mbepo Mwikomo,” aga go mapalo. Umwēne ābilikigwe “Rose ga Sharon,” aga go mapalo. “Iligála lya Kikoga,” amapalo, “Ndondwa Yandubunju.” “Yehova-yire, Yehova-rafa,” ihano-na-ibili ingīndāne, indundikigwe, ingamu syalutabulo, kangī syōsa sya isyene syāli mapalo. Nasimo sya isyene syāli ngamu.

Loli Umwene ali ni Ngamu.

⁴² Akabalilo kako Umwene älyagéne na Mōse, Umwene akāli ni Ngamu tāsi, kangi Umwene älimbulile Mōse, “UNE YONE UYU UNE YONE.” Kangi akabalilo kako uswe tukumbona Yeso pa kisu, ikuyoba mu Bahiburi untu gwa 6... Une ngusuma uluhobokelo lwinu, Mwikemo Yohani untu gwa 6. Umwene alinkuti, “UNE YONE UYU UNE YONE.”

Abene balinkuti, “Fiki, Ugwe gwe Nnyambala komma ukukinda ifyinja malongo mahano mbukusi, kangi kuyoba ukuti Ugwe ‘umbwene Abraham’?”

⁴³ Umwene alinkuti, “Bo Abraham akāli, UNE YONE.” Kangi “UNE YONE” yo Yuyo, ndusingi ulwamoto, i Mbanda ya Moto iyi yāli pa lusingi ulupye mmasiku ga Mōse, u “UNE YONE YO UNE.”

⁴⁴ Kangi lilino uswe tukusyāgānia ukuti Yeso äyobīle, yōpe, “Une nīsīle mu Ngamu ya Tāta Gwāngu, kangi umwe mukalinyāmbilīle Une mma.” Polelo, i Ngamu ya Tāta yikufimbilisīgwa ukuya Yeso. Uko ko kutalusya. I Ngamu ya Tāta yo Yeso, panongwa yakuti Yeso äyobīle lūlo. “Une ngupimba i Ngamu ya Tāta Gwāngu. Une ngwīsa mu Ngamu ya Tāta Gwāngu, kangi umwe mukalinyāmbilīle Une mma.” Polelo, i Ngamu Yāke āli Yeso.

Kangi Gabriel alinkunkolela Umwene Yeso, abasololi balinkunkolela Umwene Yeso, kangi Umwene aali naloliloli Yeso. Bo bukāli ubupapigwe Bwake, yope nu nsololi umwikemo alinkōlile i Ngamu Yāke *Imanueli*, uyu yo, “Kyala na uswe.” Polelo, “Kyala abonike pabwelu mu mbili, ukuti asoosyemo imbibi sya nkisu,” kangi, mukubōmba lūla, Umwēne āpegīgwe i Ngamu ya Yeso. Popāpo, Yeso yo Ngamu.

Kangi i Ngamu yābīkīgwe mwa Nyāmbāla; komma i kipanga, komma ikipaguko, komma ikimanyisyo, lōli u Nnyāmbāla! Umwene āsalīle ukubīka i Ngamu Yāke mwa Yeso Kristi. Lilino uswe tukusyāgānia ukuti polelo Umwēne ikwīsa ukuya buyo bwa bwīpūti bwa Kyala, kūko ugwe kummwīpūta Umwēne.

⁴⁵ Bo Umwēne akāli nukupāpīgwa, i Ngamu Yāke yākoleligwāga Yeso. Ikyēne kyāli kyākulōndīgwa fiyo, ikyēne kyāpēgīgwe kwa māma Gwāke ukwisila mu Gwāndūmi Gabrieli, ukuti i Ngamu Yāke yikukoleligwaga “Yeso, Mwanundumiana gwa Kyala,” iki Umwene aali.

⁴⁶ Apo uswe tulinakyo ikyēne, polelo. Iki kyo ikyēne, kyēne. Ikyēne kili, kuli Umwēne mwēne ntiga, ubuyo bwa Kyala ubusalīgwa ga bwīpūti. Ubuyo bwa Kyala, busalīgwe. Kyala āsalile ukwagana nu mundu; akali nkipanga, komma mu kipanga-kipaguke, komma mu kimanyisyo, loli mwa Kristi. Ubo bo buyo ubu Kyala isakwagana nu nnyambala, kangi umwene abagīle ukummwīputa Kyala, ali mwa Kristi. Ubo bo buyo bwene. Kali ugwe uli gwa Methodisti, Baptisti, Katolika,

Protestanti, kilikyosa iki ugwe ubagile ukuya, bulipo ubuyo bumobwene itolo ubu ugwe ubagile nubutalusye ukummwiputa Kyala, ubo bo buli mwa Kristi.

Baroma 8:1, āyobīle, “Polelo lilino bukayapo nabumo ubutobesye kwa bene aba bali mwa Kristi Yeso, aba batikwenda ukukongesya umbili'mma, loli ukufuma pa Mbepo.” Iyo yo Nongwainunu.

⁴⁷ Uswe tubagile ukukindana pa fimanyisyo. Uswe tubagile ukukindana pa ifimanyisyo ifitēndēka-nu-mundu. Ugwe ubagile ukubuka ku kipanga kya Methodisti, ugwe kufimbilisigwa ukuya gwa Methodisti; u Baptisti, gwa Baptisti; u Katolika, u n’Katolika. Lōli akabalilo kāko ugwe kōsigwa mwa Kristi, nukwisa ukuya mbakasya ya Mbili Gwake, bukayapo nubukindane nabumo. Ifibumba pakati pa kiyabo iki kilepuligwe pāsi kangi ugwe uli mwābūke, panongwa yakuti ugwe uli mwa Kristi Yeso. Kangi ugwe kummwīpūta Kyala mwa Mbepo kangi mu Bwānalōli akabalilo kāko ugwe uli mwa Kristi Yeso. Ulwene lo lubatiko lwa Kyala kuli ugwe ukummwiputa Umwene mwa Kristi Yeso.

⁴⁸ Lilino, nakimo ikipānga ikipāguke kibagile ukwiyo-bela iki, nakimo na kimokyene kibagile ukwiyo-bela ikyo. Ngimba umwe muli bakifu bulebule ukutendeka isyakwiyo-bela bo isyo? Ukubomba ikindu bo ikyo kubagile ukuya mbepo ya ndwananakristi, kukuyaga kwegako ukufuma kwa Kristi; ukwegako ukufumu ku Mwene. Ugwe ukabagile ukubomba ikyo. Kristi yo buyo bwēne ubu Kyala ikwagana na bīputi.

⁴⁹ Abene bikuyoba, umwisyugu. Une ndinabo abandu bikumbula une. Unnyambala ālingōlīle une pakaya patali mma, mu Beaumont, Texas. Umwene alinkuti, “Tata. Branham, linga ingamu yako yikaya pa buku gwitu gwa kipanga, ugwe ukabagila ukubuka ku Mwanya.” Ngimba umwe mubagile ukwinogonamo isya ikyo? Komma umwe ukwitika ikindu bo ikyo. Abene bikwinogona ugwe kufimbilisigwa ukuya gwa kipanga kimo kila pamo ugwe ukabagila ukubuka ku Mwanya. Ikyo kyo kisobi. Ukwitika ikyo, yo ndwananakristi. Une nguyoba iki: Linga ugwe kwitika mu mbepo gwa luko ulu, ugwe uyōngīle. Ikyo kyo kimanyilo ikinunu ugwe uyōngīle, panongwa yakuti ikyēne kikūsōsyāpo ukufuma ku iki Kyala ābōmbīle. Kyala akābikilēmo siku i Ngamu Yāke mu kipanga kilikyosa. Umwene ākibikīle Iyene mu Mwanundumiana Gwake, Kristi Yeso, akabalilo kako Umwene nu Mwanundumiana Gwake alinkuya Yumoywene. Ubo bo buyo bwabwanaloli bwa lwīputo. Nalumo ulwalo lwālyāligwe, nalimo ilyalabwe ilingi.

Pa Kristi, Ibwe ilikafu, une ngwima;
Ifisu fyosa fyo misanga yakwibila.

Ifipanga-fipāguke fisakubongotoka nu kugwa, ifikolo fisakukindaga, lōli Umwene isakusyālāga bwilanabwila.

Nabumo ubuyo ubungi ubu unnyambala abagiile ukubwaga, ukummwiputa Kyala, būbo Kyala isakuyobaga ukugomokela ku mwene, kisita buyo loli mwa Kristi Yeso. Ubo bo buyo bwēne, u buyo bwēne ubu Kyala āsalīle ukubīka i Ngamu Yāke, kangi ubuyo bwēne ubu Umwēne ikwagana nu mūndu, ukummwīpūta. Ugwe uyōngīle, ukwītīka kalikōsa akangi.

⁵⁰ Kētēsya, syosa ihano-na-bili isekelo sya kiYuda syakyungigwe mu buyo bumobwene. Abene bakakyungilemo ulusekelo lumo *apa* kuli ba Methodisti, kangi lumo ukukilania *apa* kuli aba Baptisti, lumo ukukilania *kula* kuli ba Presbeteri, lumo kunyuma *apa* kuli ba Katolika, kangi lumo kuli ba Protestanti. Syosa ihano-na-ibili isekelo syakyungigwe mbuyo bulabula.

⁵¹ Ikyene kyo kyakwimilila ikimogi fiyo apa. Uswe tubūkīle itolo ukukīnda mu Ngulilo sya Kipanga Ihano-na-ibili, ukunāngisyāga ukuti Kyala ikukyūnga i Ngulilo sya Kipanga Ihano-na-ibili mu Lisyu, kabuno i ngulilo yiliyosa ya kipanga yilinkutwala ikiyabo kya Lisyu, kangi akabalilo kako abene batwēle ikyene kangi abene balubwene u Lumuli.

Itolo bo bandu aba ku bwandilo basyāgēnie ukōsya mu Ngamu ya Yeso. Ngimba abēne bābōmbīle fiki? Abēne bātēndīke ikipanga-kipāgūke ukufuma ku kyēne, kangi ikyēne kilinkufwa palapala pala. Polelo Kyala alinkwenda palapala panja ukubuka mwa munduyumo uyungi. Umwene atisakwitugala mu kimo mwa fimanyisyo fila ni nyitikisano. Umwēne akaya nakyo nakimo ikyākubōmba ni kyēne. Kikayapo nakimo ikiniongasigwe ukufwana na Kyala. I Lisyu lya Kyala lya liikemo, lisitakubwapuligwa. Kristi yo buyo bwa Kyala ubwapakati ubwakwiputa. Umwene yo Kyala.

⁵² Syosa isekelo ihano-na-ibili sikufimibilisigwa mu ubu ubuyo bumobwene. Ugwe ukābagīle ukukyunga u lusekelo mbuyo ubungi bulibosa. Loli isyene sihano-na-ibili, ubuyo. . . Isekelo ihano-na-ibili isya kyinja sikufimibilisigwa ukukyungigwa mbuyo bumobwene. Polelo, i Ngulilo sya Kipanga Ihano-na-sibili syābagisenie ukwisa ukufuma ku buyo bumo, yula āli Kristi ikuyoba mu Ngulilo syosa sya Fipanga Fihano-na-fibili. Uko ko katikati kutalusya. Kyakwimilila, ikya Ngulilo sya Kipanga Ihano-na-sibili, loli abene batēndīke ifipanga-fipāgūke ukufuma ku kyene.

⁵³ Lilino unko uswe tukete ikyakwimilila ikingi akabalilo kōsa uswe tuli mula apa, ikyo kyo, kyakwimilila kya pāsa, kyabīkīlēngāni unsyungūlu Yeso. Uswe tukukētēsya apa ilikemo lya lilopa, ukwisila mu bufwe. Ilikemo lya lilopa lyāli buyo ubu bwābīkīlēngāni unsyungulu Kristi. Ngimba ikipanga-kipāgūke kibagile ukusōka ililopa; ngimba gwabagile ugwe ukwinogona isya kipānga kikusōka ililopa, ukusōka ililopa kwakipanga-kipāgūke? Naloliloli umma. Ikyene kikwegela

ililopa, ukusōk'ililopa ukufuma ku bumi. Kangi, ubumi bula, apa Yeso ikwisa mbubonekelo ukwisila mwa kang'osi. U kang'osi āli kyakwimilila kya Kristi, kangi kyabikaga-ngāni unyungulu Kristi, panongwa yakuti Umwene aali "Kang'osi gwa Kyala," uyu Yohani alinkumbonesya, "uyu ikwegamo ubutulwanongwa bwa nkisu." Uswe tukummwaga Yeso ikwisa mbubonekelo, apa mu Kusōka untu gwa 12.

⁵⁴ Kētésya, ubwēne bwāli buyo bwēne u bufwe bukābagile ukutika. Akabalilo kako ubufwe bwāli kifuki ukutika ikisu, bwafimbilisigwaga ukuyapo ubuyo ubusisimikisye; bosa ukufuma pasi pa iki alinkufwa. Ubuyo bumobwene itolo! Lilino, ikyene kikāsanusyāga iyene yāli nyūmba yimoyene; lōli bwālipo ubuyo bumobwene, uko ko kūko a kang'osi kagogigwaga. Kuko ililopa lya kang'osi lyaali, ugwandumi gwa bufwe akaabagile ukutika, panongwa yakuti ubwene bwaali buyo bumobwene ubu Kyala aabikile Ingamu Yake. Kangi a kang'osi kāpīgwingamu kunyuma kula mbwandilo a kang'osi. Ketesya, ubwene bwāli bo bumobwene u buyo ubwene bukābagila ukutika.

⁵⁵ Kangi lilino kilakila kiyīlile umwisyugu. Bulipo bwene ubuyo bumobwene ubu ubufwe bwamwambepo bukabagila ukutika, ilyo lya Lisyu. Ubufwe bukutoligwa ukutika i Lisyu, panongwa yakuti Ilyene lya Lisyu lya Kyala ilyabumi.

Loli akabalilo kako ugwe kubika ifimanyisyo ni Kyene, i Lisyu likusōka panja ku Lyēne. Ilyene lisakwipāgula ngati misi ukufuma ku nyēmba. Ugwe ukabagila ukufulugania ikyene palikimo. Polelo, umwe muketile, akabalilo kako ikimanyisyo kikwisa mu kipanga-kipāgūke, abene bosa bikubuka ukukonga i kimanyisyo; kangi i Lisyu likukūfwa panja, kangi likubuka pa yumo nu mundu yumo uyungi kangi ukwibālania Ilyene kangi. Likupimba pala ubwengo, bo Ilyene likubūka ukufuma ku bwitikisigwe, ulukemesigwe, lōsyo lwa Mbepo Mwikemo, kangi panja mu Luseke! Ngimba umwe mukukēta injila iyi Kyala alyēndīle? Ukutwala i Ngamu Yake, akabalilo kosa, palapala pāsi pa njila yilayila, panongwa yakuti Umwene yo Lisyu.

Kētésya, Ikyēne kikabagila ukufwa. I Lisyu lya Būmi likabagila ukufwa.

⁵⁶ Kētésya mūmo kipelelesye, lilino. U gwandumi gwabufwe akākanisigwe mma ukutika abandu abakulumba abamahala aba Igupti. Ubwene bukākanisigwe ukutika ifisu fyāke ifikemesigwe, imiyumba gyāke imikulumba, aba farao bake. Pamo, abapūti ba kīsu, u gwāndumi akākānisigwe ukutika. Ubwene bwabagile ukutika inyumba yiliyosa, ubuyo bulibosa, aligwesa, loli ubwene bukabagile ukutika kuko kang'osi aali.

Ubufwe bukabagila ukutika kūko ubuyo ubu ubupīgwe bwa Kyala buli, kangi ubo bo buli mwa Kang'osi.

⁵⁷ Kētésya, komma bope bwāli i...umwene ākānisigwe ukutika Israeli pamo abaputi ba kiHuburi bāke, kangi, pamo

kilikyosa kya fipanga-fipāgūke fyābo. Fyosa fibagile ukuya mu buyo bwa Kyala, ubupēlīgwe, pamo u bufwe bwatikīle.

⁵⁸ Kipanga, kulikosa ugwe uliko, iki ugwe uliko, kikumbela une ukuya bukindane nabumo. Loli, kilipo ikindu kimokyene ugwe kufimbilisigwa ukumanya, ugwe kufimbilisigwa ukuya mwa Kristi pamo ugwe uli mfwe. Ugwe ukabagila ukwitugasya panja pa Mwene. Ikipanga kyako kibagile ukuya kinunu mosa, ukuya nyumba; ubulilansi bwako bubagile ukuya kanunu mosa, ukuya nnyambala. Lōli akabalilo kāko ugwe kupīka u Mbili, i Lilopa, i Lisyu Iya Yeso Kristi, ugwe uli mfwe iminiti ugwe kubamba ikyene. Ubwēne bo buyo bwa Kyala busalīgwa ubwa bwīpūti. Apo po pāpo i Ngamu Yāke yili, katikati. Apo po pāpo Umwēne āsalīle ukubīka i Ngamu Yāke; komma mu kipanga, lōli mwa Mwanundumiana, Yeso Kristi.

⁵⁹ Kētésya, ubuponesigwe bwalambalele mwene mu buyo bwa kusála Kwāke, mwa kang’osi Gwāke, kangī mu ngamu ya kang’osi.

⁶⁰ Kētésya, ikyēne kyāli “kinyāmbāla” kang’osi, u umwēne, komma umwēne unkikūlu. Komma i kipanga, umwēne; lōli i Ngamu Yāke, komma ingamu yāke. Kūko Umwēne āyāga pakwāgāna na bāndu bakāli mu ngamu yāke, lōli mu Ngamu Yāke, Umwēne, u Kang’osi!

⁶¹ Lilino uswe tukuyoba, “Ikipanga, ikipanga ikikulumba, umwene abombile *iki* kangī umwene abombile *ikyō*. Umwēne akindilemo mu mbepo. Uswe tubēle mbwingi bwa bandu. Uswe tuli mu mbalilo ingulumba. Uswe twe kipanga ikyamaka. Umwene yo kindu ikikulumba.”

Loli Kyala akayobilemo siku kalikosa isya umwene unkikulu. Umwene alinkuti, “Umwene.” “Umwene,” bo buyo, u Kang’osi, komma i kipanga. Komma ingamu yāke unkikulu, lōli i Ngamu Yāke. Umwēne akābīkīle ingamu yāke unkikulu kulikōsa. Umwēne ābīkīle i Ngamu Yāke mu “Mwēne”!

Fyōbene, “Twesa uswe tukufimbilisigwa ukubomba, pamo i lisyu pamo mbombo, uswe tukufimbilisigwa ukubomba ikyene kyosa mu Ngamu ya Yeso Kristi.” Linga uswe tukwīpūta, uswe tukufimbilisigwa ukwīputīla mu Ngamu ya Yeso. Linga uswe tukusūmila ubusūme, uswe tukufimbilisigwa ukusuma mu Ngamu ya Yeso. Linga uswe tukwenda, uswe tukwenda mu Ngamu ya Yeso. Linga uswe tukuyoba, uswe tukuyoba mu Ngamu ya Yeso. Linga uswe tukōsya, uswe tukufimbilisigwa ukōsya mu Ngamu ya Yeso Kristi. Kabuno, “Fyosa ifi uswe tukubomba mu lisyu pamo mu mbombo, bomba ikyene mu Ngamu ya Yeso Kristi.”

⁶² Umwinitu yumo āyobile kwa une akabalilo kamo, ukuyobesania ikyō, umwēne alinkuti, “Nkundwe Branham, unyasi gwāngu, une ndiku...” Umwene alinkuti, “Umwene, ingamu yake yo *Gwakuti-na-gwakuti*.” Umwene yo ndumbilili,

abagile ukwitugasya apa lilino. Kangi umwene alinkuti, “Unkasi gwangu,” alinkuti, “umwene unkikulu ali ni ngamu yangu.” Une nguyobaga itolo *Jones*, panongwa yakuti ikyene kikāli Jones. Umwene alinkuti, “Lilino, umwene unkikulu atikufimbilisigwa ukusumuka mmwanya ulubunju lulilosa, ukwegu umweyo nukuyoba, ‘Lilino une nisakupyāgāla ikipālo mu ngamu ya Jones, kangi une ngusuka isahani mu ngamu ya Jones, kangi une ngusonelela imyenda mu ngamu ya Jones.’” Umwene alinkuti, “Une ndikwinogona ugwe kufimbilisigwa ukukōléla ingamu yiliyosa na panandi.”

Une ndinkuti, “Une ngwitika ugwe kulondigwa.” Uko ko kutalusya.

Kangi umwene alinkuti, “Ena, fiki? Umwene atikufimbilisigwa ukuyoba iyene. Kilikyosa iki umwene ikubomba kili mu ngamu ya Jones, ukwanda itolo.”

⁶³ Une ndinkuti, “Lōli ugwe ukālyēndilēmo siku pāsi pa lukīndi nukuntwāla umwēne, nukuyoba, ‘Isaga kindililāga, Jones.’ Umwēne āfimbilisigwāga ukwisa, ikyākwanda, ukwisila mu lusekelo, u lusekelo lwa bwēgi, ‘Jones.’ Linga umwēne akābōmbīle, umwe mukwitūgāla mu bulogwe. Kangi linga umwe mōsigwe mu njila yiliyōsa lōli mu Ngamu ya Yeso Kristi, ulwene lo lōsyo ulwa bulogwe, ulu lutikwāgīgwa mu i Bāngéli.”

Polelo, “Iki ugwe kubomba mu lisyu na mumbombo, bomba ikyene mu Ngamu ya Yeso.” Ukufuma apo, iki ugwe kubomba! Loli ikyakwanda, ugwe gwisile ukuya mu Ngamu Yake.

⁶⁴ Balipo abakīkūlu banunu bīngi nkiyūmba iki ikilo iki, abanunu, abakīkūlu abasūbilīgwa; lōli alipo yumoywene Nka. William Branham. Umwene yo yumo ikubuka ku kāya na une. Umwene yo yuyo uyu yo nkasi gwangu.

⁶⁵ Balipo abandu abanunu nkisu, ifipanga ifinunu; loli alipo u Nka. Yeso Kristi, kangi uyu yo uyu Umwene ikwisila. Kula ko kūko i Ngamu Yāke yilāmbalēle. Apo po pāpo u bwīpūti Bwāke buli, mwa Mwēne-unkikulu nu Mwēne-unkikulu ntiga. Ikyo kyo kyabwanaloli. O, ena, nkulumba. Uswe tukwaga ikyo ukuya kyabwanaloli.

⁶⁶ Lilino, fyōbéne, uswe, “Fyosa uswe tukubomba mu lisyu pamo mu mbombo, uswe tukubomba ikyene mu Ngamu ya Yeso Kristi.”

“Yikayapo nayimo i ngamu iyingi yipēgīgwe pāsi pa Kumwanya panongwa ya bupoki, lōli i Ngamu ya Yeso Kristi.” Imbombo, unto gwa 2, ikuyoba ukuti, “Kabuno ikyene kikufumusigwa kwa umwe...” “Yikayapo nayimo i ngamu iyingi yipēgīgwe pāsi pa ku Mwānya kūko u mūndu abagile ukupokīgwa, mwēne mu Ngamu ya Yeso Kristi.” Ameni. Une ngusubila umwe mukupilikisya ikyene. I Ngamu ya Yeso Kristi, kilikyosa...

Kwapamwanya-fiyo Kumwanya kupigw'ingamu Umwene, “Kyosa ikikolo mu Mwanya kupigw'ingamu Yeso,” i Bàngéli lyâyobile, “kangi kyosa ikikolo pa kisu kya pasi kipigw'ingamu Yeso.” Popápo iyo yo insaligwa-na-Kyala i Ngamu kuko Umwene abikile Iyene. Ubo bo buyo Bwake ubwa bwĩputi, buli mwa Yeso Kristi. Lilino, uswe tumenye ikyo ukuya bo ulu, nabumo ubuyo ubungi ubwakwiputa loli mwa Umwene.

⁶⁷ “Yikayapo nayimo ingamu iyingi pasi pa Kumwanya yipēgígwe pakati pa mūndu, kũko abēne bikufimbilisígwa ukupokigwa.” Ingamu Yāke yo Ngamu ya Kyala ya butabulo. Kyala ali ni ngamu ya kukoleligwa Yehova-yire, Yehova-rapha. *Yehova-yire*, “u Ntwa ikuhobokela imbibi syako syosa.” *Yehova-rapha*, “u Ntwa ikubumbulusya imbungo syako syosa.” Umwēne āli na mapalo mingi. Lōli Umwēne alinayo i Ngamu yimoyene iya butabulo, ikyo kyo kili ku luko lwa bũndu, kangi iyo yo Ngamu ya “Yeso.” Iyo yo Ngamu Yāke, Umwēne āsalīle ukubīka. Ngimba Umwene abikile Iyene kugu? Umwene alinkubika Ikyene mwa Kristi.

⁶⁸ Syosa isingi ingamu sya kipanga, ifimanyisyo, amapalo, bo bufwe ukusubila ifyene. Umwe mukusūbila i kipanga kya Methodist ukubatwala umwe ku Mwanya, umwe mutagigwe. Linga umwe mukusūbila aba kiPentekosti, ikipanga kya Pentekosti ukukukwēga ugwe ku Mwanya, umwe muyōngīle. Kangi aba Baptisti, Luteri, Presbeteri, Katolika, ikipanga kilikyosa ikingi; umwe mukusubila ingamu syabo, pamo amapalo gabo, pamo ikimanyisyo kyabo, umwe mutagigwe.

Panongwa yakuti, ugwe ukabagila nukwiputa mpaka ukwanda ugwe kwisa mbuyo bwa kwiputa. Amen. Ubo bo buyo bwēne Kyala ikwagana nu mwiputi, bo buyo Umwēne āsalīle ukubīka i Ngamu Yāke. Bosa ubungi, umwe mukusūbila mu bēne, umwe mwisakufwa. Umwēne yōpe. . .

⁶⁹ Uguni unyūngulu gwa Yeso apa, une nāngw'alīle pāsī, i Lisimbo. Kangi, Umwēne—Umwēne ikubīkīla ngāni unyūngulu apa, “Umwēne ikufimbilisígwa ukuya kisita kasolo.” Ubuyo Umwene ikubika i Ngamu Yake, u kang'osi uyu abagile ukuya kisita kasolo.

Lilino, kyo kipanga-kipāguke pamo kipanganio kiliku ubagile ugwe ukukisomekako iki; ikipanga kiliku, Katolika, Protectanti, kiJuda, kilikyosa ikyene kili? Kiliku ikipanganio, ikipanga-kipāguke, ubagile ugwe ukusomekako kila, “kisita kasolo pa kyene”? Ikyene kyo kyosa kipīkīgwe, kangi kikānīgwe!

Loli bulipo ubuyo! Aleluya! Ubuyo bula buli mwa Yeso Kristi. Kakayapo na kasolo pa Mwene. Bukayamo nu busobi mwa Umwene.

Ugwe ukabagila ukusomeka iki. Bosa abandu aba bābo bikugela ukubomba bo ulu, bikuyoba ikipanga kyabo kyo kisita busobi kangi fyosa *ifi*. Ikyene kyo kyakinanyasi, babongotola-

Lisyu, bagana, sinda bafwe, Laodikiya, ikimanyisyo, lōli ikylene kikaya Bwanaloli mma. Loli yópe Pilato mwene, undugu Gwake, alinkuti, “Une mbagile ukubwaga nabumo ubusobi mwa Mwene.” Gwake undugu Mwene alinkuyoba bukalimo nu busobi mwa Umwene. Ugwe ukabagila ukusomeka ubutulwanongwa bulibosa pa Umwene.

⁷⁰ Umwene alinkuyoba ku baputi ba masiku Gake, “Yo ani gwa umwe abagile ukunstaka Une panongwa ya butulwanongwa? Ywani abagile ukunnangisya Une ukuti Une ne ntulanongwa?”

Mbula une ikipanga kimokyene iki kibagile ukuyoba abene babombilemo siku ikindu kimo ikisobi. Nubwanaloli-ndumbula, akayapo nayumo gwa bēne, kifuki, loli iki kigogile nukubomba kilikyosa iki kilipo pa kalendala ukubomba, kifuki. Polelo pope bikwikolela bene. . . Polelo ubwene bukaya buyo bwa Kyala ubwa kwiputa, mu kimanyisyo kilikyosa pamo ikipaguko.

⁷¹ Binangu, une ndikulonda ukufulasya ubwipilike, loli une ndininongwa pa Ndumi yimo, kangu, i Ndumi yila yili, “Sókamo ukufuma nkinyanyasi iki!” Kangu linga une ngukulalusya ugwe ukuti usokemo, ko kugu Une ngukulyegága ugwe? Mbagile une ukubegela umwe ku Branham Tabernacle? Ikyene kyo bo bwingi bwa busobi bo kilikyosa kya fyosa fya ifyene.

Lōli bulipo ubuyo bumobwēne ntiga une mbagile ukukwēga ugwe, kūko ugwe uponesigwe kangu ukyūngigwe lōsa ukufuma ku bufwe, ikyo kyo mu buyo bwa Yeso Kristi, ubuyo bwa Kyala bwa ubwiputi. Apo po bulipo ubuyo une ngubatwāla umwe, ikilo iki, kūko Kyala ābikile i Ngamu Yāke. Kuko Umwene aafingile Umwene ikwaganaga nu mundu aligwesa uyu ikwisa nkati mula, Umwene abagile ukummwiputa nu mwene nu lusekelo nu mwene, ubo bo buli mwa Kristi; komma nkipanga, umma ikipanga.

Loli, mwa Kristi, Umwene yo Nyumba ya Kyala. Umwene bo buyo ubu Kyala ālisilemo, Mwene, nukwitugasya mwa Mwene. “Uyu yo Mwanundumiana Gwangu unganigwa, mwa Uyu une ngwikyela ukwitugasyamo.” Apo po pāpo Kyala ālitugesye, ātwéle i Ngamu Yāke nukuyibika Iyēne pāpo, Yeso Kristi. Polelo, i Ngamu Yāke yābikigwe mu Nnyāmbāla, u Mwanundumiana Gwāke, Yeso Kristi, mu iki Umwēne ālitūgésye Mwēne, kangu mu Nyumba yila.

Kūko, mu kwimilila, u gwaiyolo Yerusalemu, isekelo isyaiyolo, i tempeli yayolo, fyāli kyakwimilila; akabalilo kako ilyōsi likwisa nkati, ilisiku ili ingalaba yalingile nkati, iya lwitikano, nukwitugasya pāsi, kangu a Masyu ga Kyala gapilikigwemo ukufuma ku kyene.

Mo mumo a Masyu ga Kyala gapilikigwemo, ukwisa mu Nyumba, Yeso Kristi; iki, u Lukulu (kipeligwa) lwāli kyakwimilila kangu nsyungulu gwa Ulupya. Kangu akabalilo kako Umwene ikwisa mwa Kristi, Umwene alinkuti, “Uyu

yo Mwanundumiana Gwangu unganigwa, mwa Yuyo Une ngwikyela ukwitugasyamo. Kangi Une nisakusala ubuyu kũko Une nisakubũka i Ngamu Yangu, kangi kũko Une nisakwagana nu mũndu, kangi kũko Une nisakwiputilako.” Kyala asalile ubuyo; komma mu kipanga-kipagũke nakimo, lĩli mwa Yeso Kristi. Ena, nkulumba.

⁷² Umwene abagile yope nukuya “kisita kasolo,” mumo une njobiile. Nakimo ikipaguko kibagile ukwiyobela ikyo. Abene bikubomba; abene bo ndwananakristi.

⁷³ Lilino uswe tukusyagania apa, ketesya unsyungulu Gwake kangi. U—u kang’osi ikuyungigwa mmwanya. Lilino, iki kikwagigwa mu Ukusoka 12, linga ugwe kusimba ikyene pasi, Ukusoka 12:3 ukufika 6. U kang’osi ikufimbilisigwa ukuyungigwa pala ku masiku mana, ukugeligwa, ukuketa linga akene kãkufwana ukubuka ku likemo tasi. Kabagile ukwegigwa, ukugeligwa ukwandisya ku kwandisya, ku masiku mana, ukuketa linga kalipo akasolo pa kene, ukuketa linga bulipo ububine bulibõsa mu kyene, keta linga kalipo kalikõsa akasõbi na kang’osi. Akene kakufimbilisigwa ukuyungigwa amasiku mana.

⁷⁴ Lilino ketesya. Mwe bamo ba umwe mubagile ukwinogonela kala kali kayabo kanini, kagogigwe pa lya kalongo-na-mana. Lõli, umwe mukukumbukila, abene balinkwega kang’osi pa lisiku lya kalongo ilya mwesi, nukugoga akene pa lisiku lya kalongo-na-mana ilya mwesi, muketile, aka kakyungigwe ku masiku mana.

⁷⁵ Lilino, Yeso, i Ngamu ya Kyala, Kang’osi, abukile mu Yerusalemu kangi nasiku akalisilemo panja kangi mpaka ukufuma pa bufwe Bwake, ukusyiligwa, nu busyũke. Umwene akuyungigwe pasi pa balondesabusobi ku masiku mana kangi ikilo sina. Mumo mbupelesye u Kang’osi yula alimilile, akuyungigwe ku masiku mana. Apo po pãpo Pilato alinkuti, “Une mbagile ukwaga nabumo ubusobi mwa Umwene.”

⁷⁶ Uguni usyungulu gwa Umwene, nalimo ilifupa kyabagile ukukonyoligwa mwa Umwene, iki kyo kyali kipelesye, akabalilo kako abene balinkusita. Ukugoga kwa likemo, abene balinkutoligwa ukubongotola ikifupa. Linga ikyene kyali, ikyene kyapikigwaga. Kangi abene batalile biyandile i nyondo ukukonyola ififupa mmalundi ga Kristi, akabalilo kako abene balinkuti, “Umwene yo atalile afwile.” Abene batobwiile ulubafu Lwake nukwaga Ililopa na misi.

⁷⁷ Ketesya kangi ikindu ikingi ikikulumba apa. Une ngabagila ukukisania ikyene, panongwa yakuti Umwene imililaga mu fyabupi, ikyabupi kya bufu.

Une ngukumbukila akabalilo kamo abene bali ni sukulu, mu i Bãngeli, yakoleligwaga i sukulu ya basololi, kangi iyene yali sukulu naloli. Kangi uswe tukusyagania ukuti Eliya abũkile

kula ku sukulu ilisiku limo, kangi abēne balinkuti, “Uswe . . .” Abēne bālinsumile umwēne ukusókápo, balinkuti, “Akabalilo káko ugwe uli ukusyūngutíla apa, ifĩndu fikuya figolofu fiyo.” Popápo abēne bālōndága umwēne ukusókápo.

Kangi abene balinkubuka ukwakummwega umwene ifindu fyakulya. Kangi ikipambo kya baputi kilinkuuka panja, pamo abasololi, ukwakwega imbange simo, ukutendekela ikyakulya ku mwene. Kangi akabalilo kako abene bābombile, abene balinkwibungana ubukulumba ubufwale-fifunga bwa abene; kangi akabalilo kako abene bikugomokela kunyuma, ifyene fyali mbange sya ndisu, ugu gwāli mwāfi, kangi abene balinkutāgile isyene mu ndeko. Kangi indeko silinkwanda ukukina, kangi abene, umunduyumo, alinkuyoba, “Aheli, bulimo ubufwe mu ndeko. Lilino uswe tukabagile nu kulya.”

Kangi Eliya alinkuyoba, “Ndwalila une ulukufi lwa mmaboko lwa bufu.” Kangi umwene alinkwega u bufu nukusopela ubwene mu ndeko, kangi alinkuti, “Ilya. Indeko yibumbulusigwe.”

⁷⁸ Ikyabupi kya bufu kyāli Kristi. Ifisyelo filifyosa fyafimbilisigwaga ukubatikigwa lulalula, kangi akambakasya kalikosa ka bufu kabagisenie ukuya ukusyegwa lulalula, ukuya kyabupi kya bufu. Ukunāngisya ukuti Umwene yo Mbumbulusi. Umwene ikwimililambuyo, kangi ikusōsyápo u bufwe, kangi ikubika u Bumi; mu ndagilo sibili. Aleluya! Kūko u bufwe buli, u buyo bumobwene; akabalilo kako Kristi ikwisamo, u Bumi bukwingíla. Umwene yo yuyo mmayolo, umwisyugu, na bwilanabwila. Kangi kūko bwāliko ubufwe, kula kulinkuya Bumi, panongwa yakuti Kristi ātwāligwe mula, ikyabupi kya bufu.

⁷⁹ Kyo kimanyisyo ikikulumba nki ukuti ifindu ifi fyābagile ukuya linga uswe tukwega akabalilo ukufisasulania ifyēne mōsa! Lilino kētésya, nalimo ni lisyu limolyene lya misyūngulu likutoligwa. Nalimo ni lisyu limolyene lyātolígwemo siku, ilya nsyūngulu. Kilikyosa kyalyimililigwe nubupelelesye.

Umwene yo buyo bwa Kyala ubusungulígwe ubwa bwīpúti, kangi i Ngamu ya Kyala yipégígwe ku Mwēne. Umwene yo buyo bwa Kyala ubwa bwīputi, kangi i Ngamu ya Kyala yipegígwe ku Mwene. Umwene yo Lisyu lya Kyala, kangi Umwene yo Ngamu ya Kyala. Umwene yo fyosa-fibili i Lisyu lya Kyala kangi i Ngamu ya Kyala. “Umwene āli Lisyu lipeligwe ukuya mbili.” Umwene aali Lisyu lya Kyala, Kang’osi gwa Kyala, Ngamu ya Kyala, kangi aali Kyala. Ikyo kyo iki Umwene āli, nsaligwa kangi ubuyo bwēne ubwabwīpúti kwa Kyala.

⁸⁰ Kangi Kyala ikukana ubuyo bulibōsa palubafu pa Yeso Kristi; ugwe ukabagíla ukummwīpúta Umwēne kulikōsa. Umwene alinkuti, “Paitolo abene bikunyitika Une, ukumanyisya isya Kimanyisyo kya banyambala.” Umwisyugu uswe tuli ni

fimanyisyo, ifyitikano, kangi kilikyosa, iki kikumanyisya *iki* yo njila kangi *ikyo* yo njila.

Kangi Yeso alinkuti, “Une ne Njila, u Bwanaloli, kangi u Bumi, kangi nayumo umundu abagile ukwisa kwa Kyala pene papo ikwisila mwa Une.” Mmasyu agangi, “Une ne Kifigo ku kibaga kya ng’osi. Bosa pänja bo bahiyi.” Umwene yo kisilo kene. Umwene yo Kifigo. Umwene yo Njila, u Bwanaloli, u Bumi, fyosa ifi filiko; ubwingililo bwene ntiga, ubuyo bumobwene ntiga, ubwĩputi bumobwene ntiga, i Ngamu yimoyene ntiga.

Kilikyosa kipinyiligwe kwa Yeso Kristi. Lōsa u Lwitikano Ulukūlu lupinyiligwe ku Mwene. U Lwitikano Ulupya lupinyiligwe ku Mwene. Kangi i Kipanga umwīsyūgu kipinyiligwe ku Mwēne, ukwisila mu Lisyu lya ngomelesyo Syāke. Bukayapo ubuyo ubungi, pamo i Ngamu iyingi, pamo paliposa, kuko Kyala aafingile ukwaganamo siku nu mūndu; mwene mwa Yeso Kristi, ubuyo Bwake ubusūnguligwa bwa bwĩputi.

⁸¹ Kētēsya, Kyala afingile ukwagana na bĩputi Bake mbuyo bumobwene itolo, kangi ubo bo bwa kusungula Kwake Kwene; komma ukwa kusūngūla kwītu, komma ukwa kwīnogona kwītu; lōli ukwa kwīnogona Kwake, ukusūngula Kwake. Kangi ubwēne bukuyaga buyo kūko Umwēne ābīkīle i Ngamu Yāke, kūko Umwēne āsalīle. Polelo uswe tukusyagania ukuti uswe tukwaga kūko i Ngamu Yāke yāli, iki Umwene āsalīle, ukwisila mu kusāla Kwāke Mwene.

⁸² Lilino ukuti uswe tukwāga ubuyo Umwēne ābīkīle i Ngamu Yāke, ikyo kyo, mwa Kristi Yeso, kangi bukayako ubuyo ubungi nabumo, pamo nayimo ingamu iyingi, ngimba ugwe mwikutisiigwe isya ikyo? Yoba, “Ameni.” [Ikilundilo kikuyoba, “Ameni.”—Nsimbi.] Lilino, ikindu kya ikylene kyo kyakuti, linga uswe tukwaga kūko ubuyo bula buli... Ubuyo bwa bwĩputi bukaya nakumo bwitikisiigwe, kwene mwa Kristi.

Ugwe ubagīle ukupinduka, ugwe ubagīle ukubōmba ikyo, lōli ugwe utikwīpūta tāsi. Ugwe kusuma ubuhobokelo. Peteri āyobīle...

Pa Lisiku lya Pentekosti, akabalilo kako abene bababonaga bosa bikuyobela mu ndimi, kangi ifika ifikulumba ni fiswigo fikuboneka pa buyo, abene balinkwanda ukuseka, i kipanga kyābombile, kangi balinkuti, “Abanyambala aba bīswīle nu bwālwa ubupya. Abene bikubōmbela ngati bandu bagāle. I...” Maria u mfunde, bosa ba abene, bāli palikimo, mia yumo na malongo mabili ga bēne. Kangi abēne bapepelukaga ngati banyāmbāla bagāle, nukuyobela mu ndimi, nukukindilila nkyeni. Abēne balinkuti, “Abanyāmbāla aba bīswīle nu bwālwa ubupya.”

⁸³ Lōli Peteri, imile pamwanya, alinkuti, “Abanyāmbāla na bakundwe, aba abanyāmbāla aba bakīsula nu bwālwa ubupya,

kabuno iyi yo itolo sala ya butatu iya lisiku. Loli iki kyo kila kyāyobígwe nu nsololi Yoeli, ‘Kangi ikyene kisa kubonekaga mmasiku ga bumalikisyo, ikuti Kyala, Une nisakōnelelaga mōsa u Mbepo Gwangu pa mbili guligosa; abīnu abanabalumiana na banabalīndwāna bisakusolola; pa babombi-banyambala na babombi-bakikulu nisa Une konelelaga mōsa isya Mbepo Gwāngu. Une nisakunāngisya ifimanyilo mmyānya pamwanya, kangi pa kisu; moto, imbanda sya moto, imyuyi gwa lyōsi. Ikyene kisakwisa ukuboneka, bo likāli i Lisiku ilikulumba kangi ilisisya ilya Ntwa ukufika, ukuti aligwesa uyu isakukōlelaga pa Ngamu ya Ntwa isakupokigwa.’”

⁸⁴ Akabalilo kako abene bapilike iki, abene bankulasigwa mu ndumbula syabo, kangi balinkuyoba, “Banyambala na bakundwe, ngimba uswe tukubombaga fiki?”

⁸⁵ Peteri alinkuti, “Pinduka, aligwesa gwa umwe, kangi yaga bōsígwe mu Ngamu ya Yeso Kristi kubufyule bwa mbibi syinu, kangi umwe mwisa kwambililaga ikyabupi kya Mbepo Mwikemo. Namanga ulufingo lo lwākuti syosya i ngulilo syankyeni.” Lilino uswe tukwāga ikyo.

⁸⁶ Lilino uswe tukulōnda ukwāga mūmo uswe tukufikápo *nkati* mwa Umwēne. Ngimba uswe tukufikága bulebule mbuyo ubu ubwa bwīpúti? Bakorinti Bakwanda 12 likumasya ikyene, kabuno, “Nu Mbepo yumoywene!” Komma ukwisila mu kipanga kimokyēne, komma ukwisila mu kimanyisyo kimokyēne, komma ukwisila mu ntimi yumoywēne, komma ukwisila mwa bishopu yumoywēne ntiga, komma ukwisila mu mpúti yumoywene. Loli, “Nu Mbepo Mwikemo yumoywene uswe twesa tōsígwe mu Mbili gumogwene,” ugu go Mbili gwa Yeso Kristi, kangi ukwilambika ku kyabupi kilikyosa iki kilambalele mu Mbili gula. Ena, nkulumba! Komma ukwiyīngisya, komma ukwāndisya kya fimanyisyo, komma ukufūtila mōsa, ukuleka pāsa, ukuponania-maboko, pamo nakimo ikingi. Lōli, ukwisila mu Kupāpigwa uswe tōsígwe mu Mbili gwa Yeso Kristi! Amen. “Nu Mbepo Mwikemo yumoywene uswe twesa tōsígwe mu Mbili gumogwene.”

⁸⁷ Kangi ngimba u Mbili gula go fiki? “Ku bwandilo āliko Lisyu, kangi u Lisyu āli na Kyala, kangi u Lisyu āli Kyala. Kangi i Lisyu lyapeliigwe ukuya mbili kangi nukwitugasya pakati pitu.” Ngimba uswe tubagīle ukuya bulebule mu Mbili gula nukukāna i Lisyu limolyēne ilya Ikyēne, pamo ukubika Ilyēne kukulekako kubuyo bumo ubungi kūko Ilyēne likaya nukuya mu Mbili? Ngimba uswe tubagile ukubomba bulebule ikyene? Ubuyo ubusūnguligwe na Kyala!

⁸⁸ Kētésya, kangi akabalilo kāko ugwe naloliloli gōsígwe mwa Umwēne, ubuketi bwabwanaloli bo kuti ugwe kwitika Umwēne, u Lisyu.

Ngimba ugwe ubagile ukuya bulebule kiyabo kya Mwēne kangi polelo kumkāna Umwēne? Ngimba une mbagile bulebule ukukāna ikiboko kyāngu ukuya kiboko kyāngu? Linga palipo . . . Linga une ngubōmba, kilipo ikindukimo mubongo kisobi na une. Kangi une mbagile bulebule? Linga kilipo ikindukimo mubongo kisobi na une, ukupika ikyo kiboko kyangu, ukupika ikyo kyo kilundi kyāngu, kilipo kimo kitamisye nu mwitiki uyu ikukana i Lisyu lililyosa ili Kyala āyobilemo siku kangi āfingilēmo. Kilipo ikindukimo mwambepo kisobi na yula umwitiki unkoleligwabubo.

⁸⁹ Ugwe ukabagile ukupika akasimbo kamo ka Umwene, panongwa yakuti ugwe uyile kiyabo kya kilakila. Ugwe uli kiyabo kya Mwēne panongwa yakuti ugwe gōsigwe mwa Umwēne; ukwisila, u Mbepo Mwikemo akutwele ugwe mu Mbili gwa Yeso Kristi. Kyo kindu kimogi nki!

⁹⁰ Kyala aali nu buyo bumo Umwene aalyaagene na—Umwene aalyaagene na Abraham, kangi pala Abraham iiputaga. Fyosa ukwikilila mu Lwitikano!

Kangi i Lisyu Lyake ilifingigwe lisakuyaga likulinganisigwa mwa ugwe, ukwisila mwa Umwene. Ngimba umwe mukipilikisye kila? I Lisyu ili Umwene afingile ukufwanikisya mu lisiku ili umwe mukwitugasyamo: umwe mwisakuyaga bakalata abasimbigwe ba Kyala, bikubaligwa na bāndu bōsa. Komma iki ugwe kwiyobela, lōli iki Kyala ikubōmba ukwisila mwa ugwe, kisakuyoba panja nukulātapo ukukinda kalikosa ugwe ubagile ukwiyobela. Kyala āyobīle, “Ifika ifi fisakukongaga abene aba bikwitika.” Ikyo kikuyoba ukwisila mwa ugwe.

⁹¹ Umwēne āyobīle isya ngulilo iyi, iki kikuyaga lilino. Abitiki ba ngulilo iyi bikufimbilisigwa ukwitika Iki, iki Umwēne āfingile umwīsyūgu. Itolo kilakila bo mūMo abene bafimbilisigwe ukwisa mu ngalaba, ukupokigwa; ukusōka panja pa Igupti ukupokigwa; abene bikufimbilisigwa ukwisa mwa Kristi, ukuti bapokigwe lilino, mu Ndumi ya Lisyu, ukuti Umwene yo yuyo mmayolo, umwisyugu, na bwilanabwila.

⁹² Ngimba ugwe kufika bulebule mu Kyene? Nu losyo! Ulosyo lwa fiki, amisi? Nu Mbepo Mwikemo! “U Mbepo yumoywene, uswe twesa tōsigwe mu Mbili gumogwene.”

⁹³ Kangi i Lisyu Lyake ilifingigwe, Umwene atisakubomba . . . Ugwe utikufimbilisigwa ukukilingania Ilyene. Umwene ikulilingania Ilyene ukwisila mwa ugwe; ifi ugwe kubomba, iki Umwene aafingile ukubomba. I Kipanga iki kikukonga Umwene isakuyaga kifuki fiyo bo Umwene mpaka abandu bisakumanya.

Keta Peteri na Yohani akabalilo kako abene balalusigwe isya ukubumbulusya unnyambala pa kipata ikikoleligwe Kimogi. Abene balinkuti, “Abene bāsyāgénie,” abaputi bala bābombile, “ukuti abene bāli fyosa-fibili basitakumanya kangi banyambala

basitakumanyila,” loli abene bikwega ubukētesi ukuti abene baali na Yeso. Panongwa yakuti, (fiki?) abene baabombaga ifindu ifi Umwene aabombile.

⁹⁴ Umwene abagile ukuya pa mbombo ya Tata. Kangi umwisyugu ikyene kibagile ukuya kilakila.

⁹⁵ Lilino, kumbukilaga, Umwene yo yuyo mmayolo, umusyugu, na bwilanabwila; kabuno Kyala ikwāgána na ugwe mwa Umwēne, ubuyo bwēne ntiga ubu buliko; namanga apo po pāpo Umwēne asalile ukubika i Ngamu Yāke, mwa Yeso. “Yeso” yo Ngamu ya Kyala. Kumbukilaga, Tata, Mwanundumiana, Mbepo Mwikemo, yo mapalo ku Ngamu “Yeso Kristi.”

⁹⁶ Akabalilo kāko Matai āyobile, “Būka umwe polelo, manyisyaga ifikolo fyōsa, ukubosya abene mu Ngamu ya Tata, ya Mwanundumiana, kangi ya Mbepo Mwikemo.”

Mūmo ikyēne kikalinganisigwa kanunu umwisyugu, nukuyoba, “Mu ngamu ya Tāta, ngamu ya Mwanundumiana, ngamu ya Mbepo Mwikemo.” Ikyene kikasimbígwa nukusimbígwa mma. Ikyene kyo, “Mu Ngamu,” kimokyene, “ya Tāta, Mwanundumiana, Mbepo Mwikemo.” *Tata* yikaya ngamu, *Mwanundumiana* yikaya ngamu, *Mbepo Mwikemo* yikaya ngamu; agene go mapalo.

Amasiku kalongo nkyeni, Peteri alinkufyuka mmwanya kangi alinkuti, “Pinduka, aligwesa gwa umwe, kangi yaga bōsígwe mu Ngamu ya Yeso Kristi.” Polelo umwene aabombile iki Umwene aalimbulile umwene komma ukubomba? Umwene aabombile iki Umwene aalimbulile umwene ukubomba. I Ngamu ya Tāta, Mwanundumiana, kangi Mbepo Mwikemo yo “Ntwa Yeso Kristi.” Umundu aligwesa mu Lwitikano Ulupya alyosisigwe mu Ngamu ya Ntwa Yeso Kristi.

⁹⁷ Komma u mūndu yumoywene mu i Bāngéli ālyōsigwémo siku mmapalo ga Tāta, Mwanundumiana, Mbepo Mwikemo. Ikyo kikālisilémo siku mu kuyapo mpaka i kimanyisyo kya Nicaea kyābīkígwe ku Nicaea, Roma. Ulwēne lwāli bulagili bwa kipanga kya Katolika, kyālyālile, ukusisimikisígwa ikindu kilakila, mwa katekisimu. Une ndinakyo ikyene, uko ko kutalusya, *Ifundo Sya Lwitiko Lwitu*, na fyosa bo ifyo, ukuti ikyene naloliloli kyo kimanyisyo kya Katolika gwa Roma. Abēne bisakubāūla umwe ikyēne kikaya mu i Bāngéli; lōli abēne bikuyoba abēne bali na maka ukusanusya a Masyu gala, linga abēne bīganile, panongwa ya pāpa. Une ngindéne.

Yeso Kristi yo yuyo mmayolo, umwisyugu, na bwilanabwila. “Kangi aligwesa uyu isakwegaga i Lisyu limolyene ukufuma mu li Bangeli ili,” alinkuyoba Yeso, “pamo ukubika ilisyu limolyene mu Lyene, ikiyabo kyake kisakwegigwa ukufuma mwa Buku gwa Bumi.” Limolyene i Lisyu; komma i fundo, pamo a kayabo, lōli i Lisyu limo! “Aligwesa isakwegamo siku limolyene i Lisyu . . .”

⁹⁸ Ku bwandilo, Kyala āfugatile abāndu Bāke ni Lisyu Lyāke. Limolyene i Lisyu, libyondoligwe, kwapelile ubufwe bulibosa, ububabe'ntu bulibosa, ubusulumanie bulibosa. Eva, ākābongotwilemo siku i fundo; umwēne ābongotwile i Lisyu. Akabalilo kako Yeso ikwisa pakati pa Buku...Lila lyāli lyakwanda lya Būku.

Akabalilo kāko Yeso ikwisa pakati pa Būku, ngimba Umwene ābagile ukuyobaga fiki? “Ukwene kusimbigwe ukuti umundu atisakuya nu bumi nu nkati gwene, loli ni Lisyu lililyosa ili likufuma pa kanwa ka Kyala.”

Mu bumalikisyo bwa Būku, Busetuli untu gwa 22, ilinandi lya 18, ikiyabo kilakila ikyabumalikisyo ikya i Bāngéli, Yeso ikuyoba Mwene, alinkuti, “Une ngwilāta ukuti linga u mundu aligwesa isakwegaga i Lisyu limolyene ukufuma mwa Būku uyu, pamo ukongelelapo i lisyu limolyene ku Lyene, ikiyabo kyāke kisakwēgigwaga ukufuma mwa Būku gwa Būmi,” panongwa yakuti umwēne yo nsololi gwabusyōbi kangi aniongesye abandu, kangi lililopa lyābo lisakubaligwaga ku kiboko kyake, panongwa ya kubōmbo būbo.

⁹⁹ Uswe tukufimbilisigwa ukukyunga u buyo bumobwene bula ubwa bwiputi, ubu bo, Yeso Kristi i Lisyu, yulayula mmayolo, umwisyugu, na bwilanabwila. Ameni. Umma ndaga. Kumbukilaga, bukayapo u buyo ubungi ubwakwiputilamo, komma u buyo. Kyala āsalile Ubwene.

¹⁰⁰ Yohani, kubutali kunyuma kula ku kapinya pakati pa Lwitikano Ulupya nu Lwitikano Ulukūlu. Pilikisya kifuki lilino. Kētésya kifuki. Yohani, ingwāsi ingulumba yila, yikwisa ukupululuka ukufuma ndulangalanga ilisiku limo, amapiko gāke amakulumba gikubala. Umwene alinkumulika ukusuluka pa kiloboko kya Yorodani, unkulumba ungwāsi nsololi uyu abikil'ulalo pakati pa Ulukūlu na Ulupya u Lwitikāno, kangi umwene alinkubakōlēla abene ukufuma ku kililo na kukimama. Umwene akolelaga i lisiku lya bupinduko.

Kūko kwālisile aba Farisai na Saduki panja; umwene alinkuti, “Komma ukwanda ukuyoba nkati mwa wimwene, ‘Uswe tulinagwe Abraham ukuya tāta gwitu,’ panongwa yakuti Une ngubabūla umwe Kyala abagile ukufuma ku mabwe aga ukufyūsyā bāna kwa Abraham.” O, mwe!

Akabalilo kako umwene andege ukusopa Inongwainunu yake panja, nu kuyoba, “Pala ikwima Yumo pakati pa umwe, Uyu umwe mukamanya. Une ngāli ngandingenia Umwene, loli une ngwisakummanya Umwene akabalilo kako Umwene ikwisa. Une ngaya gwakufwana nukwabula ikilato Kyake. Lōli Umwēne isakukukōsya ugwe nu Mbepo Mwikemo nu Moto. Kangi ikyākūpūtila Kyāke kili nkiboko Kyāke; Umwene isapelelesya lōsi ikipālo Kyake, kangi Umwene isakōkya imīndu ku Moto ugu gukabagile ukusimisisgwa.”

¹⁰¹ Yila ingulumba ingwāsi ya Nongwainunu yitūgésye pala, bo umwēne ikukūta ni fyakutitisa fyāke ifikulumba. Kangi ikyakinyanyasi kilinkusōka panja, pamo Herodi, u mwalafyāle pa kabalilo kala, umfumisi, ālyegile unkasi gwa nkulu gwake. Kangi ngimba umwe mubagile ukwinogonela ukuti ingwāsi inywamu yitugesye pala nukukolelela ulutengano lwāke ku ikyo?

Bamo mwa bēne balinkuti, “Komma ugwe ukulūmbilila pa bwegi nu kusōka lilino, Yohani, panongwa yakuti pala itugesye Herodi.”

¹⁰² Umwene alinkwenda palapala pa kisyo kyake nukuti, “Ulwene lukaya lulagilo kuli ugwe ukummwega umwene.” Kutalusya!

Fiki, umwene, āli ikylene? Umwene āli ngwāsi yila ukufuma ku lulangalanga. Umwene akamanyisigwe pasi pa butitisa bwa mūndu nu lukemelo, lwa kipanga-kipāguke kimo. Lōli umwēne āmanyisigwe pāsi pa maka ga Kyala Mwenemaka, ukumanya iki kyabagile ukuyaga pala. Umwene aamenye ubwilinganie bwa Mesiya.

Aleluya! I lisyu likusanusya, “Ntufye Kyala!” Komma ukutila. Une ngamfulasya nayumo mpaka na lino. Une ngaya gwakulalamuka. Une mmenye palapala kūko une ndiko.

O, akabalilo kako une ngwinogona isya umwene, ingwāsi inywamu yila ukupuluka panja pala nukwitugasya pāsi! Umwene alinkuti, “Une ngumanya Umwene akabalilo kako Umwene ikwisa.”

¹⁰³ Ilisiku limo umwēne ālīmīle pala, ikulūmbilīla. Abapūti bāli ukukilania ulubafu ulungi, alinkuti, “Ugwe kusanusya pisakwisa akabalilo ilikemo lya lisiku lililyosa lisakusosigwapo; i tempeli ingulumba iyi iyi uswe tuyēngīle, kangi syōsa imbombo uswe tukubikapo, uswe ikipanga-kipāgūke ifinywamu?”

Umwene alinkuti, “Kakwisaga akabalilo kako fyosa ifyo fisakumalika.”

“Ikyene kikabagila ukuya. Ugwe gwe nsololi gwabutungulu!”

¹⁰⁴ Kangi umwene alinkukelengania. Umwene alinkuti, “Kéta, pala Umwene alipo! Pala bulipo ubuyo ubusaligwa bwa Kyala ubwa bwīputi. Pala alipo u Kang’osi, u Kang’osi gwabwanaloli uyu ikusoosya imbibi sya nkisu.” Umwene akāyobile, “Apa ikwisa u m’Methodisti, apa ikwisa u m’Baptisti, pamo u m’Katolika.” Umwene alinkuti, “Pala pikwisa Kang’osi gwa Kyala uyu ikusoosya imbibi sya nkisu.”

Ulubafu lwene ulwabuponesyo ubu buliko bo mwa yula Kang’osi gwa Kyala. Mwa Mwēne ntiga bo bupoki; komma nkipanga kilikyōsa, ikimanyisyo kilikyōsa, abandu balibosa, tāta aligwesa, u māma aligwēsa, unnyambala umwikemo aligwesa, pamo nakimo, ubuyo ubwikemo. Ikyēne kili mwa

Kyala Mwikemo, u Ntwa Yeso Kristi, kũko Kyala ābĩkĩle i Ngamu Yāke pa Bũndu bwa mũndu, ku lutabulo, Yũyo āhōmbile untengo gwa uswe twebonangi. Ubo bo buyo bwēne ubu bulipo ubupoki. Ilyo lyo Lyālabwe une ngwĩmapo.

¹⁰⁵ Yohani alindingenie Umwene. Umwene alinkuti, “Une ngālimmenye Umwene akabalilo kako une nālimbwēne Umwene ikwisa ikwenda pala, loli panja pala pápo une namanyisigwe i sukulu yangu...” Komma ku sukulu ya bunyakyala mumo ugwise abombile; komma ukuya mputi, amanyisigwe. Loli mmatengele, kuko umwene āli mu sukulu ya bunyakyala iya Kyala Mwenemaka, ikugulila ku Lisyu lya Kyala; komma iki ikibugutila kimo kya banyambala bāpānjila mōsa, loli iki Kyala ayobilepo isya Ikyene. Kangi akabalilo kako Yohani aketege mmwanya nukuketa u Mbepo ikwisa, umwene alinkuti, “Une ngubikila ubuketi, uyu yo Mwene.” O, mwe!

Apo po bulipo ubuyo bwako ubwakwiputa. Apo bulipo ubuyo bwako bwakwifisa. Pala alipo u Kang’osi gwa Kyala uyu ikusoosya imbibi sya nkisu. Komma nakimo ikipanga, nakimo ikimanyisyo, pamo nakimo ikingi, loli Kang’osi gwa Kyala uyu ikusoosya imbibi sya nkisu.

¹⁰⁶ Muketile mũmo Yohani ābĩkĩle ikyēne? Umwēne akāyobĩle, “Umwe baFarisai yo ntalusi, umwe baSadukai, Herodia.” Umwene alinkuti, “Pala alipo u Kang’osi.” Ubo bo buyo. Umwene alinayo i Ngamu. Umwene yo Yuyo. Komma ingamu iyingi pasi pa Kumwanya!

¹⁰⁷ Ketesya isi Yeso ayobile ukufwana na Yohani lilino. Ilisiku limo Yohani alinkutuma kwa Umwene, ukuketa ifi Umwene abombaga. Yeso alinkuyoba isya umwene, “Umwene āli yo lula ulukulumba kangi ulumuli ulumulike,” Ukubanāngisya abene injila indalusye yakuti abene babagile ukukōngēsya bo bukāli ubwisile Bwāke, ubwisile Bwāke bwakwanda. Pilikisya kifuki. Komma ukupondwa ikyene. Yeso āyobĩle, “Yohani āli lula u lumuli.” Malaki 3, nabumo ubusobi! U nsololi nu lumuli ulukulumba lukumulika alinkundingania Yeso ukuya Yumoywene ntiga, “u Kang’osi.” Abakang’osi bosa abangi abaputi bayobela ngapo, kangi fyosa ifindu ifingi fila, fyali fitoyofu. Apa aalipo “Kang’osi!” U nnyambala nu lumuli ulukulumba lukumulika, ulu Yeso aayobile umwene aali.

Malaki 3 āyobile, “Une ngutumaga u ntumigwa Gwangu pankyeni pa kisyo Kyangu ukutendekesya injila.” Kangi yuyo uyu ātumĩgwe ukutēndekesya i njila, alinkundĩngānia Umwene, u buyo. “Uyo yo Mwene! Bukayapo ubusobi. Uyo yo Umwene! Une nguketa ikimanyilo kikukōngēsya Umwene. Une mmenye ukuti Umwene yo Mwene; u Lumuli lukusuluka ukufuma ku Mwanya kangi lukubuka pa Mwene.” Ubwene bwali bo busisimikisye, yula aali yo Mwene.

¹⁰⁸ Polelo, nkundwe gwangu, une ngulonda ukukulalusya ugwe i kindukimo, mu kwigala. Uswe tubagile ukuyoba iki. Mwa Malaki 4, ngimba uswe nuswe tukafingiligwe ingwāsi iyingi, i Mbanda ya Moto ukuya yikukōngága, ukunāngísya ikipānga ikyakusoba ilisiku ili ukuti Umwene yo Bahiburi 13:8, “yulayula mmayolo, umwīsyúgu, na bwilanabwila”? Ngimba uswe tukafingiligwa uyungi yula ukwisa ukupululuka ukufuma ku lulangalanga? Amen! Ikyo kyo katikati Bwanaloli. Ko kufwana nu kufwanikisigwa bulebule ikylene kili kwa Luka 17:30, kūko u Mwanundumiana gwa mundu (Ngwāsi) isakwisetulaga Mwene ukutwala kukuya nakimo amabuyo gosa agangi agabwīputi, bo fi fipanga-fipāgúke na fyosa bo ifyo!

Kyala āsalíle ubuyo Bwake. Yohani ātile, “Pala Ubwene bulipo!”

¹⁰⁹ Kangi polelo uswe tufingiligwe ikindu kilakila mu lisiku ili, Malaki 4, “Ukusanusya indumbula sya bana ukugomokela,” ukuyoba ukuti Umwene akaya mfwe mma, ifindu ifi fikaya fya ngulilo iyingi; losyo mu Ngamu ya Yeso yikaali kunyuma kula mma, loli Umwene yo lilino yulayula. Amen. Ukutwala ku nakimo ubuyo bosa ubungi ubwa kwiputa, ikyo kyo iki ingwāsi ya lisiku-lyabumalikisyo yikubōmbaga, ukunāngísya ukuti fyosa ifingi fya ikylene kyo butoyofu, ikipanga-kipāgúke kyo butoyofu, loli ukubasosola abene kangi ni kika kilakila iki Umwene ábombile, ukuti Umwene yo yuyo mmayolo, umusyugu, na bwilanabwila. Aleluya!

¹¹⁰ Mōpe, mu Busetuli 4:7, uswe twāli nafyo i Finyamana fina ifi uswe tufumilemo itolo ukukindamo nafyo.

Ikyakwanda kila kyāli, uswe twasyāgénie. . . tukusyāgania, yāli ngalamu. Kila kyāli Kinyamana ikyakwānda iki kyābūkíle panja ukwakwāgána na matati ga lisiku lila, i Ngalamu ya Kikolo kya Yuda.

Ukufuma pāpo Umwēne ikwīsa i Kinyamana ikikōnge. Kangi uswe tukusyāgania, i Kinyamana ikikōnge kyāli ngambako, iki kyo kinyamana kya nsigo, i likemo. Mmasiku ga kikatedro kya Roma, i Kipanga kilinkufwa; i likemo.

Ikikonge kyālisíle, āli nnyāmbála, āli Kinyamana ni kisyo kya nnyāmbála. Kangi u nnyambala yula āli yo mbumbakangi, ubumanyili bwa mundu, ubufundakyala, na fyosa bo ifyo.

Lōli i Kinyamana ikyabumalikisyo iki kyāli pakupululuka, i Kinyamana ikyabumalikisyo iki kyāli kyākwise, i Bāngéli lyāyobíle ikyéne kyāli ngwāsi ukupululuka. Aleluya! Kangi u nsololi āyobile, mu lisiku ili, “Ukwene kwisakuya Bwelu.” O, mwe! “Mu lisiku lila kwisakuyako u Bwelu.”

¹¹¹ Pala gafumile pakuyapo ilisiku lya babumbakangi. Pala lifumile pakuyapo ilisiku ili lyo itolo nsyungulu, kakabagile ukukōlela pamusi pamo pakilo. Lōli nkabalilo ka namayolo, nkabalilo ka Ngwāsi:

Ukwēne kwisakuyaga Bwēlu kifuki kabalilo
 ka Ngwāsi,
 Akayīla ku Lwīmiko ugwe naloliloli
 kwisakwāga;
 Mu njila ya mmīsi bo Bwēlu umwīsyūgu,
 Ukusyiligwa mu Ngamu imbala ya Yeso.
 Bakeke na bakāngāle, pinduka ku mbībi syīnu
 syōsa,
 U Mbepo Mwikemo naloliloli isakōsya ugwe
 nkati;
 Kabuno Imuli sya kunamayolo isi sisīle,
 Iyēne yo fundo ukuti Kyāla na Kristi bali
 Yumo.

¹¹² Ameni! Ukwene kwisakuya Lumuli ukufwana akabalilo ka namayolo, ubuyo bwene ubusaligwa bwa Kyala ku kwiputa. O, ngimba i Ndumi iyi yikwisako ku fiki, ngimba Umwene ikubombaga fiki? Kangi mu lisiku Lyake ukwene kwisakuya Lumuli ku kabalilo ka namayolo, kangi (fiki?) ukwākwambililigwa a bāna Bāke ukugomokela ku kaya ku Kīsu ikifīngigwe, ukwisila mu kimanyilo kilakila ikya Mbanda ya Moto iyi yalongolīle a bāna ba Israeli ukwisila mu lulangalanga.

Ubuyo bwene ubusaligwa na Kyala ukwiputula, Yeso Kristi. Ubo bo buyo bwēne bulipo. Iyo yo Ngamu ntiga Kyala ali nayo ku bupoki. Ikyo kyo iki Umwēne apēle ingamu ku Mwanya, akabalilo kāko ikyēne kili pa kīsu, yo Yeso Kristi.

¹¹³ O kipanga, O bandu, ntulwanongwa mwinangu, komma ukusūbīla mu nakimo ikingi lōli Yeso Kristi. Komma ukunsubila mu ndumbilili aligwesa. Komma ikunsubila mwa aligwesa uyungi ukukupoka ugwe. Ukusūbīla'mma nkipanga kilikyosa, ikimanyisyo kilikyosa, ikipaguko kilikyosa. Subila mwene mwa Yeso Kristi, kabuno Umwene yo Lumuli lwa sala.

Unko uswe twinamisye imitu gyitu.

Ukwēne kwisakuyaga Bwēlu kifuki kabalilo
 ka namayolo,
 Akayīla ku Lwīmiko ugwe naloliloli
 kwisakwāga;
 Mu njila ya mmīsi bo Bwēlu umwīsyūgu,
 Ukusyiligwa mu Ngamu imbala ya Yeso.
 Bakeke na bakāngāle, pinduka ku mbībi syīnu
 syōsa,
 U Mbepo Mwikemo isakwingilaga naloli;
 Imuli sya kunamayolo sisīle,
 Ikyene kyo fundo ukuti Kyāla na Kristi bali
 Yumo.

¹¹⁴ O, nkundwe, kalumbu, linga ugwe ukapinduka tasi, linga ugwe ukōsigwa mu Ngamu ya Yeso Kristi, ngimba ugwe ubagile ukutendeka ikyo ukwanda ikilo iki? Ngimba ugwe ubagile

ukumpa Kyala u lusako lwakukwambilila ugwe mbuyo kũko ugwe ubagile ukummwĩpũta Umwẽne? Kumbukilága, panja pa kula, bukayapo ubuyo ubu Kyala áfĩngĩle ukwagana na ugwe nukwambilila ubwĩpũti bwĩnu.

¹¹⁵ Ugwe kuyoba, “Nkundwe Branham, une ngwĩpũta itolo ukuya gwabwanaloli-ndumbula!” Popápo Kaini ábõmbĩle. Umwene átẽdike uluko lulilosa lwa kyabupi ulu Abelõ ábõmbĩle, loli ikyene kyáli kyabupi ikisobi. Ugwe ubagile ukubuka ku kipanga, nukuhomba ifyákalõngo fyáko, kangi ukubõmba imbombo yáko bo u Nkristi ikulõndĩgwa, itolo ukuya gwabwanaloli-ndumbula bo unnyambala aligwesa pamo nkikulu.

Une nimile apa lilino ku fyinja fimo malongo matatu, ukusyungutila a káya apa, nukukõlela i Ndumi yiyiyi iyi. Une ngwisa ukuya nkangale. Une ngabagila ukuya na umwe pabutali fiyo mma. Lõli kumbukilága, mu Lisiku lya Bulõngi, ilisyyu lyángu lisĩmbĩgwe, kangi ilyẽne lisakuyoba pánja ukulwana na ugwe.

¹¹⁶ Bulipo ubuyo bumobwene itolo ubu Kyala ikubika i Ngamu Yake, kangi ubo bukaya kipanga’mma, loli mwa Yeso. Bulipo ubuyo bumobwene ubwa bwĩputilo, bwene bumobwene ubuyo ubu ugwe gwambililigwe, kangi ubo bo mwa Nganigwa, Yeso Kristi. “Yikayapo nayimo ingamu iyingi pasi pa Kumwanya, yipẽgĩgwe pakati pa bāndu, kũko bapokĩgwe,” nakimo ikipanga, nakimo kimanyisyo, nakimo nakimo. Yeso Kristi!

Kangi ikyo kyo kibagile ukuya Ndumi ya sala iyi, “Ukupyanikisya ukugomokesya indumbula sya bāna, ukugomokela ku Lwitiko ulu akabalilo kamo lwátwaligwa ku bikemo.” Ngimba umwe mutikukyitikisya Ikyene ikilo iki?

Kangi akabalilo kako uswe twinamisye imitu gyitu pasi.

¹¹⁷ Kangi aba bikulonda ukukumbukiligwa ndwiputo, ngimba mubagile ukufyusya ifiboko fyinu. Uswe tukabagile ukutendeka ukukõlela kwa pakigemo, panongwa yakuti ikyene kyo itolo bingi fiyo. Kyala abasaye umwe. Mwe! Pa kimama kyangu, une ngusakikisya balipo bamia batatu.

¹¹⁸ Lilino ku kiboko kyāngu ikililo, ngimba umwe mubagile ukufyusya ifiboko fyinu, yoba, “Une ngulonda ukukumbukiligwa.” Une ngusakikisya balipo mia yumo na malongo mahano, pamo ukongeleláo, pa kiboko kyāngu ikililo.

Uswe tulinakyo ikipanga pasi apa ni kitubwi ikinywamu ikya misi; ntimi, u ntimi unnunu, Nkundwe Orman Neville, ababombeli, abanyambala aba ukusyungutila apa aba umwe mukubabona nu kwagana. Ilisiku lililyosa, ikilo kilikyosa, isala yilyiosa, abandu aba bikulonda ukosigwa, aba bapindwike, ikyene akabalilo kosa kikugũlila. Kangi linga ugwe kupilikila ululagilo lula, ugwe usisimikiisye, nu lufingo lwa Kyala, linga ugwe uli gwabwanalolindumbula mu ndumbula yako, ukwambilila ulosyo lwa Mbepo Mwikemo.

¹¹⁹ Bulipo ubuyo bumobwene itolo ubwa bwĩpúti. Lilino, ubu bukaya mu kipanga iki. Ikyo kyo mwa Kristi. Ngimba uswe tukummwāga bulebule mwa Umwēne? “Nu Mbepo yumoywene uswe twesa tōsígwe mu Mbili gumogwene ugu.”

Unko uswe twipute.

¹²⁰ Gwempala Kyala, bo fiboko ifi fyāfyukile mmwanya, ifyene kimanyilo kimokyene iki kyāli pasi pa ndumbula, ukwifika ukuti abene bo basisimikisiyi abene bakufumwa ubutuli ukufuma kwa Ugwe. Une ngusumila kwa aligwesa gwa bene, Tata. Kangi une nguyaga pakwandisya ku Lisyu Lyako. Ugwe uyobile, “Umwene uyu ikupilika i Lisyu Lyangu, kangi nukummwitika Umwene uyu ālindūmīle Une, ali nu Bumi ubusitakumalika, kangi atisakwisa ku Bulongi; loli akilenie ukufuma ku bufwe ukubuka ku Bumi.”

Tata, itolo ukuya nasōkilepo ukufuma nkaya imilungu minandi, ukugomokela kangi, ukulālusya, “Bule isya *uyu* yula?”

“Fiki, abene bakindile.”

“Ena, bule isya . . .”

“Abene bakindile.”

¹²¹ Gwempala Kyala, yumoywene ntiga na yumoywene ntiga uswe tukukōleligwa, yumo pa yumo uswe tukufimbilisigwa ukwagana nu kumeleligwa ukwēnda pasi ukukinda i kikoga kya nsyungulu gwa bufwe. Kangi ikyēne kyo kikumeleligwa kwa aligwesa gwa uswe, ukuya bakufwa. Lōli, ikilo iki, Ugwe utupele uswe ubusūme Bwake, ukuti linga uswe tubagile ukwitika pa Mwene nu kosigwa mu Ngamu Yake, ukuti Ugwe ubagile ukutwēgela uswe nkati. Kangi polelo mu Mbili ugu, u Mbili gwa Kristi, komma nkipanga, loli mu Mbili gwa Kristi, u Mbili gula gutalile gulōngigwe. Ugwene gutisakufimbilisigwa ukwisa ku Bulongi. Kyala ālyonile panja ubugasi Bwake pa mbili gula, kangi u mbili gula go mwābūke ukufuma ku butulwanongwa; kangi, ukuya mwa Umwene, kikutubika uswe mbwābūke ukufuma ku butulwanongwa, ukwisila mu Buhombi Bwāke ubu bwāfwīle panongwa ya uswe. Kangi nkati mula uswe tuli nu bulilanisi yumo nu nnīne, akabalilo kako i Lilopa Iya Yeso Kristi, Mwanundumiana gwa Kyala, ikutukyunga uswe bēlu ukufuma ku butulwanongwa nu bubwapuligwe.

¹²² Tāta Kyala, une ngusuma ukuti Ugwe kwegaga aligwesa gwa bene mu Kitangalala Kyako. Tupaga ikylene, Kyala. Palingayaga nayumo gwa bēne ayōngīle; palingayaga u ndumiana pamo ndindwana, nnyāmbāla pamo nkīkūlu. Ntwa, bamo mwa bāndu bāngu bēne bitugesye apa, ikilo iki, aba bali panja ukufuma pāsi pa Lilopa lila. Bo bununu bulebule une mbagile ukukumbukila amasyu ga bába gwangu! Kangi une ngusuma, Gwempala Kyala, ukuti nayumo gwa bene isakutagigwaga. Tupaga ikylene, Ntwa. Une ngwitika Ugwe lilino, na fyosa ifi une ngufimbilisigwa ukwitika nafyo.

123 Segelelaga pa bakundwe bangu, bakalumbu, binangu, apa mbuyo ubu ikilo iki na panja ukukilania i fōni. Ifingipo ifisu ifikindane fikupilikisya nkati, injila yosa ukufuma ku Kiloboko Kyakubusōkelo mpaka ku Bwīngililo. Une ngusuma, Gwempala Kyala, kubutali pāsi ukukilania ulungalanga kula mu Tucson, kubutali kula mu California, kula ku Nevada na Idaho, kubutali kula ku Busōkēlo kangī ukusyungutila, kula mu Texas; akabalilo kako ulukōlelo ulu lukupīgwa, abandu bitugesye nkati—nkati ntupanga utunini, mbukusyilo mafuta, ntwaya, bikupilikisya nkati. O Kyala, ngulamba u nnyambala unsobi yula pamo nkikulu, ndumiana pamo ndindwana, ku sala iyi, ukwisa kwa Ugwe. Tupaga ikylene lilino itolo. Uswe tukusuma ikyēne mu Ngamu ya Yeso, ukuti abēne bisakubwāga u buyo bwa būponesyo ubu bo akēne ko kabalilo.

Akabalilo kako, uswe tukuketa ilisimbo-lya-kiboko pa kibumba, ikisu kikuya kyālutende, akabalilo ka lubāngo kali kifuki. Ikiyabo kya kisu kyitu kikwībila, ikiyabo ikingi kikubunguluka nukupufuka na kasenyenda, mumo Yeso āfingile kukuyaga. Unko ukwene kungayaga kubutali fiyo ku bene, Ntwa. Abēne balitikisyāga ikyēne lilino, namanga uswe tukutwāla abēne kwa Ugwe ukuya fyabuponjoli bwa lukomano, ubwa Nongwainunu, mu Ngamu ya Yeso. Ameni.

124 Ngimba ugwe kwitika Umwene? Kyala akusaye ugwe. Balinga bikwitika ikyo kyo Bwanaloli, ku kimama kyangu? Fyusya ikiboko kyako. Balinga ku kililo kyāngu? Fyusya ikiboko kyāko. Kyala akusaye ugwe. Na mumbutali une ngukētela, aligwesa. Ubo bo Bwanaloli, binangu. Kyala amenye ikyo kyo kyabwanaloli.

125 Lilino akabalilo kōsa mwa Umwene, kangī ukuya mwa Umwene, ugwe uli nako ukufikila ku kilikyosa iki Umwene āfwilile. Kangī ngimba Umwene ābombīle fiki? “Umwene afulasigwe panongwa ya ngilanio syitu, akuyubuligwe panongwa ya butulwanongwa bwitu; u lufundo lwa luteengano lwiitu lwaali pa Mwēne, kangī ni filabelabe Fyaake ifya fikoti uswe twabuumbulusiigwe.” Ngimba umwe mukwitika ikyo? Ngimba ugwe kwitika mu buhombe Bwake panongwa ya bubumbulusyo lilino?

126 Ngimba balipo balibōsa ababine pakati pa uswe? Unko abēne bafyūsye amaboko gābo, kukililo pamo kimama. Ifilundilo ifikulumba ifya bubine. Une ngutoligwa ukukōléla ulukindi. Umwe muketile, une ngaya. . . babagila ukufyuka pa kigemo. Yikayapo injila ya kubombela ikylene.

Abene bali nasyo ingomano sya nyiputo panja mmabuyo agangi, kuli ababine, mu fipanga ni findu, ukusuluka mu kipanga.

Une ngubasumāga umwe ikindukimo. Balinga aba bitiki bali pala? Fyusya ikiboko kyako. Umma ndaga. Une nguyaga

pakwandisya kwa umwe i Lisyu, ili lyo Kristi. Ubulagilano bwa Yeso ubwabumalikisyo ku kisu, kangi ku Kipanga, ndigi, Umwene ayobile iki, “Ifimanyilo ifi fisakukongaga abene aba bikwitika; linga abene bikubika amaboko gabo pa babine, abene bisakubumbulukaga.” Balinga bamenye ikyo kyo kyabwanaloli, Mariko 16, yoba, “Ameni.” [Ikilundilo kikuyoba, “Ameni.”—Nsimbil.] Umma ndaga. Une ngukusuma ugwe ukuya mwitiki ukubika amaboko pa mundu yumo pankyeni pa ngwe. Itolo ukwāla amaboko gāko pamwanya pa munduyumo nkyeni mwa ugwe, kangi unko uswe aligwesa pamwene ipute u lwīputo kuli aligwesa uyungi lilino. Bika amaboko ginu pamwanya pa munduyumo kifuki na ugwe.

¹²⁷ Ntwa, apa pankyene pa une lyo bokosi lya fifunga, utunini utupatu twa fyombo; u māma yumo unkangale alambalele ku buyobumo, ikufwa, u mwāna kifuki ku bufwe, abandu ababine kulikosa. Uswe tukubala mu li Bangeli ukuti abene begaga ukufuma mumbili gwa Pauli ififunga nu twenda utwakupiyila, kangi ifyene fyabikigwe pa babine; kangi imbepo inyali, kangi imbepo isyakinyanyi, kangi ububine, ni mbungo, syāsōkiléko ku bāndu. Lilino, Ntwa, uswe tumenye uswe tukaya Mwikemo Pauli, lōli uswe tumenye ukuti Ugwe ukāli kusyāla yulayula Yeso, u buyo bwene ubupīgwe-na-Kyala ubwabwīputi. Kangi lilino, umwisyugu, abandu aba bafumwisye ulwitiko lwabo lulalula, mumo bikwitika ngati abandu bala baabombile. Naloliloli Ugwe utēndike injila ku bēne! Kangi une ngubika amaboko gāngu pa tufunga utu nukusuma ukuti i mbungo nu bukubilwe busokengemo mu mibili gwa bāndu ifi fisakwaligwapo mu Ngamu ya Yeso Kristi.

¹²⁸ Lilino, uswe tumanyisigwe, ukuti bo Israeli isaga ukufuma ku Igupti, mu lukindi lwa mbombo, abēne bāli pa nsebwe gwābo ku kisu kyālufingo. I Nyānja Ingeseфу yilinkwingila mu njila yābo. Kangi Kyala alinkukētēla pāsi ukwisila mu Mbānda ya Moto, kangi inyanja yilinkuya nulutende, yilinkwiniembela kunyuma, kangi ukwitikisya Israeli ukukilania ku kisu ikifingigwe. O Kyala, keta pasi ukwisila mu Lilopa lya Yeso, ikilo iki, kangi ububine buliyiniembetelaga kunyuma, kangi Setano asosigwege panja. Kangi abandu balikilaniaga ku lufingo lula lwa bukafu bununu na maka, ukuti Kyala alinkuti, “Pamwanya pa findu fyosa, une nalondaga ukuti ugwe ubagile ukukaba mbukafu.”

¹²⁹ Lilino bo Ugwe kukēta kula, Ntwa Yeso, amaboko ga bāndu aba balambalēle pa yumo nu nnīne, abene bikwitikisania ulwitiko lwabo, ukuti Ugwe uyobile, “Ifika ifi fisakukongaga abene aba bikwitika.” Abene bikwiputa mu njila yabo bene, ku nnine. Umundu uyungi uyu ikukwiputula abene.

¹³⁰ Lilino, Ntwa, ikyakutatikano iki kibōmbigwe, ukuti Sētano, unsyobi unkulumba, umwene akaya nu bwābuke nabumo ukukolelela u mwāna gwa Kyala. Umwene yo kindu

ikiponjoligwe. Yeso Kristi, ubuyo bwēne ubwabwīpúti, i Ngamu yēne iyabwanaloli, ālimponjwīle umwēne pa Kalivari. Kangi uswe tukwiyeḡéla i Lilopa Lyāke papapa lilino, ukuti Umwēne āponjwīle ububīne bulibōsa, imbungo yiliyosa.

Kangi une ngukōléla Sētáno ukukileka ikilundilo iki. Mu Ngamu ya Yeso Kristi, sōka panja pa bāndu aba, kangi abēne batēdekigwe bābūke.

¹³¹ Aligwesa uyu ikwitikisya ububumbulusyo bwabo pa lwalo lwa Lisyu ilisimbigwe, ukutendeka ubuketi bwako pa kwima pa malundi gako nu kuyoba, “Une lilino ngwitikisya ububumbulusyo bwangu mu Ngamu ya Yeso Kristi.” Fyuka mmwanya pa malundi ginu.

Ulutufyo luyege kwa Kyala! Mwaketa lelo umwe. Ketesya ukukilania apa, aba balemale ni findu bikufyuka. Ulutufyo luyege kwa Kyala! Ikyo kyo kyene. Itikaga itolo. Umwene ali apa. Bo buswigisye buki!

¹³² Panja pa kilundilo, panja pa sambo, umwe mukufimbilisigwa ukuketa! Une ngwinogona u mundu aligwesa muno, pápo une mmanyile, pamo ukukinda bosa ba abene, bimile pa kabalilo aka. O, ko kabalilo akaswigisye kaki! U Kuyapo kwa Ntwa, ikyo kyo iki! “Kūko u Kuyapo kwa Ntwa kuli, kukuyako ubwabuke.” U Mbepo gwa Kyala ikutupela uswe ukuya bābūke.

¹³³ Lilino ukuti Umwene atubumbulwisye uswe, uswe tukwitika ikyene. Umwene atupokile uswe; uswe tukwitika ikyene. Bala bābo bikulonda ukosigwa, ikitubwi kitendekisye. Akabalilo kalikosa, isala yiliyosa iyi ugwe kulonda ukwisa, pabagile ukuyapo umunduyumo pala ukutūla ku kyene.

Kangi lilino une ngwinogona, bo uswe tukāli ukwīgála, uswe tubagīle ukwīmba ulwimbo ulwaiyolo ulwa kipanga. “Une nunganile Umwene, une nunganile Umwene panongwa yakuti Umwene alinganile une tasi.” Fyusya ifiboko fyitu kwa Kyala nukwimba ulwene ni ndumbula syitu syōsa!

Uswe tukulonda ukwagana na umwe apa ndubunju, pa sala ya lwele-na-yimo-na-sinda, i nyumba yiyiyi iyi, ku kimanyisyo kya *Bwegi Nu Kusōka*. Umma ndaga.

Unko uswe twīmbe ulwēne lilino palikimo.

Une nunganile Umwene,

Unko ikilundilo ikikulumba iki kīmbe lula lilino! Kubutali panja pa sambo, imba ulwene, numwe.

Panongwa yakuti Umwene alinganile une

Kangi ālyūlīle ubupoki bwāngu

Pa mpiki gwa Kalvari.

¹³⁴ Ngimba ikyene kyābombīle kugu? Pa mpiki gwa Kalvari. Akabalilo kako uswe tukwimba ulwene kangi, une ngulonda

ugwe ukuponania nu munduyumo kifuki na ugwe, utigi, “Kyalala akusaye ugwe, mwendanjila.”

Une . . . (. . . ? . . .)

Panongwa yakuti Umwene ukwanda . . .

Kangi älyülile ubupoki bwāngu

Pa . . .

¹³⁵ O, ngimba ugwe utikungana Umwene? Ngimba Umwene akaya nswigisye? Ngimba Umwene yo Buyo bwako Bwakwifisamo? Umwēne yo Lyālabwe nkisu ikyābukatale, i Kiponesya nkabalilo ka mbelo, Mbuponelo bwene une mmenye. Polelo:

Ulwitiko lwangu lukuketa kwa Ugwe,
Ugwe Kang’osi gwa Kalivari,
Mpoki Gwamwakyala;
Lilino mbilika une bo ngwiputa,
Sosyamo ubwitopbesye bwangu bosa,
Unko une ukufuma ilisiku ili
Njege gwesa Gwako!

Unko uswe tufyūsyē amaboko gītu bo uswe tukwīmba ikyēne.

Ulwitiko lwangu lukuketa kwa Ugwe,
Ugwe Kang’osi gwa Kalivari,
O Mpoki Gwamwakyala;
Lilino mbilika une bo ngwiputa,
Sosyapo ubonangi bwangu bosa,
O unko une ukufuma ilisiku ili
Njege gwesa Gwako!

Unko uswe twinamisye imitu gyitu lilino akabalilo kako uswe tukung’ung’usya ulwene.

Bo ngwenda nguto inditu iya bumi,
Kangi ubusulumanie ukusyungitila une
bukusāta,
Yaga Ugwe Ndongosi gwangu;
Kagaga ingisi yiyege pamusi,
Fyula amasosi ga misulumanie,
Pamo ukundeka une nsobege
Ukufuma kwa Ugwe ndubafu.

Akabalilo kako umwe mwīnéme imitu gyīnu, untimi gwitu unganigwa, Nkundwe Orman Neville, isakusātisya ikilundilo.



65-0220 Ubusunguligwe Na Kyala U Buyo Bwa Kwĩputilámo
Sukulu Yapamwanya ya Parkview Junior
Jeffersonville, Indiana U.S.A.

KYANGONDE

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org